



१०६५

गुं पुन्हि

लाभरत्न तुलाधर

रामशेखर

सूर्यबहादुर 'पिवाः'

पद्मरत्न तुलाधर

मोहनलाल 'पांशु'

मदनमोहन मिश्र

मदनकृष्ण श्रेष्ठ

कृष्ण नापित व रामकृष्ण श्रेष्ठ

भगवानदास श्रेष्ठ

सानुराजा बज्राचार्य

इलं झीत पिवा चवनी मखु, ई लिसें झी न्हाये माःगु दु ।
उकिं झीगु दे न्हाज्याकेगु कुतलय् लिधंसा बीगु
जिमिगु नं दुनुगवाःया इच्छा दु ।

४३० लुमंका दिसँ

भाजुरतन इन्जिनियरिंग एण्ड सेल्स प्रा. लि.

◆जिपि◆

- लुकास सर्भिस ओवरसीज, विलायत व
- इण्डियन लुकास सर्भिस, भारतया उत्पादन कार, ट्रक इत्यादिया स्पेयर पार्ट्स
- मेसि फर्गुसन ट्रैक्टर भारतीय व बिलायती
- बिलायत स्थित क्राइस्लर कम्पनीयागु कार व मेमेनु बाहन
- रेण्को कम्पनीयागु बलच प्लेट
- इण्डियन अक्सिजन लिमिटेडया विभिन्न प्रकारयागु अक्सिजन ग्यास व
- मेमेगु विभिन्न कम्पनीया मेसेनरी व अन्यान्य सामग्रीया

—(०)— जिपि —(०)—

नेपाल अधिराज्यया निरति वितरक खः

—: सेवा यायेगु अवसर विया दिसँ:—

भाजुरतन इन्जिनियरिंग एण्ड सेल्स प्रा. लि.

पो० बा० नं० १३३

उद्योतिभवन्, कान्तिपथ, काठमाडौं

शाखा — बीरगञ्ज, विराटनगर, भैरहवा, हेटौडा



नेपाल भाषाया
लयपौ

दं १८/४

थ्यंल्या: १५७

नेपाल सम्बत १०९५ गुंला

संरक्षक
चित्तधर 'हृदय'

सम्पादक व प्रकाशक
हेमब्रज बज्राचार्य

सहायक सम्पादक
विष्णु चित्रकार

व्यवस्थापकपि
पद्मरत्न तुलाधर
भूषणप्रसाद श्रेष्ठ

वर्द्धिया १२१-

छगूया २१

ख्यालि म्ये

माल श्री

- लाभरत्न तुलाधर

हाय रे ज्याखुनि तता गुलि तिसिकुति छला
जउभन व्यकुं च्याना: हानं बने तेनाला ॥ धु ॥

समा:ज्वलं छप्व:चा, जा:गु ह्यांगु ब्यागचा
पिचुगु नेतालय् हाइ ! गुलाफ स्वां निपव: चा
स्वयां स्वान बांला: थें छ नं साप बांला:चा
छंत स्वस्वं मुमि यं थें स्वयाचर्वीप लाताचा ॥१॥

जयां बान घ:बां लू, ह्यास भति कवल: लू
पलपसा त्व:थें थोगु मिछा पलेह: बां लू
स्वा: भचा हंय्त्वा:, अथेसानं आहा !
इखुं चिया स्व: धाय् त्वेक सप: पकुमकु ला: ॥२॥

लंया बुत्ताय् ज:धुं लू, हाइला हाइला धैथें जू
थिकिथिकि संगु अहो ! मुतिमालि त्व: थें चू
जिगिजिगि च्वंगु ह्याचा, मिसरिया स्व:चा
छं पला: त:याय् तक मुनीगु हाप्व:चा ॥३॥

मिछा छंगु नील: मछा, नसला सां काय्ला
छन्त स्वया जक व्यूसा जि नं नी मजुइला
प्वाथ दथुयागु तेषुं गुलि जक छाय्पा च्वं
जीवबया अय्ला: कूगु प्वंगु सलिचा थें च्वं ॥४॥

(हाइ रे ज्यापुनी तताया 'पेरोडि' म्ये)



अंग्रेजी व संस्कृत नेपाल भाषाया सन्तान खः

★ पद्मरत्न तुलाधर, पी. आर. टी.

नेपालय् आः तक स्वानाच्वंगु भाय् मध्यय् नेपाल भाषा दकलय् पुलांगु भाय् खः । सृष्टिवा छुनाज्या दकलय् न्हापां थनहे जूगुलि १ नेपाल भाषा संसारया दकलय् पुलांगु भाय् नं खः । उकिं थ्व भाय्या प्रभाव संसारया फुक्क न्हूगु व पुलांगु भासय् लाइगु स्वाभाविक खः । संसारया फुक्क धयाथे भासय् नेपाल भाषाया खंग्वः दुहां वनाच्वंगु दु २ । नेपाल भाषा व मेमेगु भाय्या खंग्वः ज्वःलाःगुयात आकस्मिक जक धयां मगाः । थुकियात नेपाल भाषाया प्रभाव तथ्यंक मेमेगु भासय् लाःगु धाये माः ।

छललः पण्डिततय्सं संस्कृत भाय् संसारया दकलय् पुलांगु भाय् खः धकाः क्यनेत खःगु खँ सुचुकाः मखुगु खँ जक न्ह्याःने तये हयाच्वंगु दु । नेपाल भाषाया भ्याः हे ज्ञान महुपि पण्डित धाःपिसं भाषाया अनुसन्धान याइगु तसकं न्हिले मास्ति वइगु खँ खः । थौं तकया अनुसन्धानं कयंगु दु नेपाल भाषाया दकलय् अप्वः खंग्वः संस्कृत भासं त्याये कया तःगु दु । संस्कृतय् दुहां वनाच्वंगु नेपाल भाषाया फुक्क खंग्वः लिकाल धाःसा संस्कृत भाय् भाय् हे मखया वनी । संस्कृत भाय् नेपालय् दुहां वयाः नेपाल भाषानाप

निद्रः (२०००) दं मयाक नाप नाप च्वने खंगुलि हे थौं थुलि च्वन्हाये फुगु खः ३ । तर संस्कृत भाय् न्ह्याक्वहे च्वन्हाःसां जनताया भाय् जुयाः स्वाये मफु । थुकिया मू कारण संस्कृत भाय् उबलय्या विद्वानतसें साहित्य व विशेष यानाः धर्म ग्रन्थ च्वयेत जक दयेकूगु भाय् जूगुलि खः । संस्कृत भाय्या नासं हे नं बांलाक सी दु थ्व भाय् मनूत भुसंस्कृत जुड धुंकाः तिनि दयेकूगु भाय् खः । तर नेपाल भाषा आदि कालनिसें दुगु भाय् खः अर्थात मनूत नुवाये सयेवं हे दयेकूगु भाय् खः । संस्कृत भाय् आर्यतय्गु पुर्खौली भाय् नं मखु । आर्यत नेपालया च्वापुगुंइ वयाः तपस्या यानाः सयेके सीके धुंकाः नेपालया नेपाल वासी-तय्गु अर्थात नेवाःतय्गु (नेपाल वासीया च्वाहाःगु रूप नेवाः खः ४) सभ्यताय् भयलय् पुनाः सभ्य जुइवं तिनि इमिसं संस्कृत भाय्यात नाला काःगु खः । संस्कृत भाय् ल्हाइपि व च्वइपि आर्यत स्वयाः नेपाल भाषा ल्हाइपि भाजुत यक्व पुलांपि खः ५ । थये जूगुलि संस्कृत भाय् नेपाल भाषा स्वयाः तसकं न्हूगु भाय् खः । प्राचीन नेपालया साधारण जनताया भाय् नेपाल भाषाया खंग्वः-

(त्यं ३८ पेजय्)

१ “शिवले यहि ल्याएथे सृष्टिको पहिलो विहान”- रेडियो नेपालया छपु राष्ट्रिय म्ये ।

२ स्वया दिसं, “भ्याःया ल्यूने ल मडु हँ” प. र. तुलाधर, साहित्य शृंगार, दं १, ल्याः १ ।

३. ठाकुरलाल मानन्धर, ‘जः’ दं ७, ल्याः छ ।

४. स्वया दिसं ‘नेपाल भाषा व्याकरण’ या भूमिका- शुक्रराज शास्त्री ।

५. स्वया दिसं, ‘भाजु शब्दया महत्व’, ठाकुरलाल मानन्धर, ‘मूसः निबन्ध’ सं. कमलप्रकाश मल्ल ।

की साहजी

सूर्य बहादुर पिवा:

[सिद्धान्त, एकता, राष्ट्रियता, इमान, कार्यशीलता, धर्म, फेशन ... आदि बन्हः तयेगु पसः घकाः चवयातःगु साइनबोर्ड छपाः दु । लुखाया जवखवं निम्ह पालेत दु । “दुहां वने ज्यू” व “दुहां वने मज्यू” घकाः चवयातःगु पालपाः खाइगु निगू नोटोश बोर्ड दु ।]

निर्देशक :- भृगुराम श्रेष्ठ
 ख्यालःस्वतः रामलाल साय्मि
 तेजनारायण साय्मि
 स्वाःपुचः अमृत साय्मि
 मधुसुदन ज्यापु
 कोछे सक्ष्मीलाल चित्रकार
 लाय्कूसाः, गौतम गुरुजु
 ये । पि. आर. तवः

साहुः— कीसं करोडौं बां खपले धुन । आःतक कीत कीगु व्यापारं गुलि लवः वःगु खने दु ?
 जितः छकः न्यंकिसा, सेक्रेटरी !

सेक्रेटरीः— सुथ न्हापां दनाः पशुपतिइ व स्वयम्भूइ वनीपिं मनूतय् धापूकथं कीसं तातुनागु ई बुलुहुं वयावं च्वंगु दु हँ ।

साहुः— वयावं च्वंगु दु हँ घयां जक मज्यूनि, कीला व्यापारी साहु । ल्याः चालय् स्वाइपिं ल्याः चालय् हे सीपि । अमिसं कीत छु छु सबुद प्रमाण बिल लय् सा ?

सेक्रेटरीः— थौं कन्हय् थःगु सिवाय् करपिनिगु वास्ता मदये धुंकल हँ मनूतय्के, थःहे जक नयेगु थःहे जक जिइकेगु धून जुये धुंकल हँ मनूतय् ।

साहुः— धर्म गुलितक मदये धुंकल लय् मनूतय्के ?
 सेक्रेटरीः— मां, अबुं काय् म्हाय्पिस्त सर्वे पानाः आखः ब्वंकीगु तर कमाइ दयेव वहे काय् कलाःया नामय् सिमन्ति ढलानगु छे दयेकाः मां बौ त्वःताः सुत्त पिने च्वं वनीगु हँ ।
 छःयाथाय् वनाः छः भागि याःसां भावभक्ति ला जुये धुंकल हँ कलाःयाके ।

साहुः— मनूतय्के ग्याः पहः गुलि दु लय् ?
 सेक्रेटरीः— कलाः खनाः ग्यायेगु त्वचं थ्यूगुलिं मनूत थौं कन्हय् छुं खनाः हे ग्याः हँ ।

साहुः— मनूतय् बोलि वचनया भाः गुलितक दनि लय् ?

सेक्रेटरीः— आः घयागु अले मखु धाइगु हँ थौं कन्हय् ।
 कलाः भाःत ला तमसुक यानाः जुइमन्थु ई

जुड़ धुंकल हँ । कलाःया नामय् ध्यबा
बैंकय् तःपि व छेँ दय्कूपि गुलिखे नांगां
जुये धुंकल हँ । अय्सां मिजंत मामेया
न्याःने थुमे बरोवर हँ ।

पाले:— (दुहां वयाः साहुयात सलाम याइ) पिने
छम्ह मनू वयाचवंगु दु ।

साहु:— ज्यू दुने ववना हिँ ।

जागिरदार:— नमस्कार साहुजी !

साहु:— नमस्कार, दिसँ । छि सु थें ? छि छु धाये-
माःगु दु थें ?

जागिरदार:— जि छम्ह जागिरदार छः । साहुजीं ध्यबा
भचा त्याये बिया दीला धकाः ... ।

साहु:— छि छु तलव मवःला ?

जागिरदार:— तलव मवःगु मखु, तलव वः । तलव नयेत
हे गाःगु मखु साहुजी । मचाखाचा दु, कलाः
दु, थः दु । जागिरंला हिं छछाः हे नयेत
मुश्किल ।

साहु:— छि भचा सोफाम्ह जागिरदार थें च्वंका ।
मेमेपि जागिरदारतय्सं जागिर नःगु हे
निदँ प्यदँ मरुनिबलय् थथाय् खागु छेँ
दंगु, कलाःयात बांलाक तिसा वस्तं पुंकाः
होण्डाया ल्यूने तयाः जूगु मबंला छि ?

जागिरदार:— खना साहुजी । मखनागु मखु, तर अमिसं
गथे यानाः ध्यबा कमय्यात खनागु मखु
थम्हं ।

साहु:— अय्सा छि ज्या अर्थात् कार्यशीलता थनि-
निसँ बःहः तया दिसँ जिथाय्, जि स्यना बी
का ध्यबा कमय् यायेगु काइदा ।

जागिरदार:— जागिर नयाः ज्या मयासँ गथे चवनेगु ?
सरकारं कार्यभारं मुक्त याना मबीला

जितः ?

साहु:—

अय्सा छि लच्छिया निगू जक एकादशी
दुथाय् हानं मेगु एकादशी दयेकाः वृत
चवनादिसँ । मचाखाचा, जहानपि वृत
तयादिसँ, अले धर्मतमा जुयाः याकनं
म्वाःम्वाकं स्वर्गय् नं कासँ । मेगु जि छितः
छु धाये ?

जागिरदार:—

साहुजी ध्यबा कमय् यायेगु ट्रीक स्यना
बिया दीसा जि ज्या बःहः तयेत तयार दु ।

साहु:—

ज्या यानाः जस दंगु व प्रमोशन जुडगु
मुलुक मखु ख, ज्या याइम्ह व याःम्हथें
च्वंक छता चवने सय्के माः । गनेद्यःयात
न्हापां लड्डु छायाः पुजा याइगु मुलुक ख
कीगु धकाः छि मस्यूला ? लड्डु छायेत
लड्डु न्यायेमाः, लड्डु न्यायेत ध्यबा माः
ध्यबा धइगु कमय्याये सयेके माः । ध्यबा
दुसा थन फुक्कं दु । ध्यबा मदुसा थन छुं
मदु ।

जागिरदार:—

गथे याःसा ध्यबा दयेके फइ लय् ?

साहु:—

अड्डाय् इलय् वनेगु । फाइल छें हयाः
पुइकेगु, अले कःमितय्सं छुचाकं अप्वः
पिकायेत धलि खः हे चिग्वः यानाः छाइथें
छुचाकं पिकायेत स्वयेगु ।

जागिरदार:—

छिगु धापू, जि सरकारी स्वयाः तरकारी
अप्वः नयेत स्वयेमाःगु जुलका मखुला ?

साहु:—

आः तिति छि भचा खँ थुलथें चवनका ।
ला, तरकारी अप्वः नःसा कीगु प्वाथय्
प्रोटिन दुहां वने । प्रोटिन नःसा सकाः
ल्हनी की । उकि छि ल्हंकेगु विचाः दुसा
ज्या बःहः तयादिसँ । ज्या बःहः तयेत छि

ज्या मयाते नं ज्या याना च्वंह्ये छता
चवने सयेके माः का ।

जागिरदारः— अथेसा जि छि धयादीये ज्या बःहः तयेत
तयार दु । तर थव खँ छता जिमि कलातं
हे नं मसिइ माः । थव खँ कलाःयात नं
मसीकेत छु याये माली लय् ?

साहुः— कलाःयात फुक्कं खँला धया तये हे मज्यू,
कलाःयात मखुगु खँ धायेबलय् पाप लाये
नं फु । इमित लय्तायेका छता तयेमाःका
साःसाःगु नकाः च्हनहुगु फेशन याकाः,
बां बांलाःगु तिसा वस्तं पुंकाः । थुलि
याका तलकि लय्ताइका अपि । भाःतं
खुया हल ला धंगु नं वास्ता दइमखु अमिके,
भातं ह्येकाः, लाकाः, घूस नयाः गनं हल
धडगु वास्ता किस्ता हे दइमखु अमिके ।

जागिरदारः— अयसा ज्या बःहः तयेत तयार दु जि ।

साहुः— ए सेक्रेटरी ! ज्या बःहः तयेगुया भोग
बन्धकी तमसुक छगू ठिक या ।

सेक्रेटरीः— तमसुक ला जी छापय्याका तयागु हे
दु नि । ज्या बःहः तयेगुया तमसुक छकू
लिकाये मालका मखुला ? वय्कःया स्वंगू
पुस्ताया नां छकः दयेवंला तुरुन्त तयार
जुइ (फाइलं तमसूक छगू लिकाइ) छिगु
स्वंगू पुस्ताया नां छकः धया दिसँ ।

जागिरदारः— चन्द्र शम्शेरया दासया छय्, जुद्ध शम्शेरया
वैठकेया काय् अले नां जिगु फन इन स्यंचा,
जिल्ला नोकर जिल्ला । बूगु नयेमखंगु
सालय् । (सेक्रेटरीं चवयावं यंकी)

सेक्रेटरीः— का सा साहुजी अले जागिरदार साहेब
तमसुकया भाय् छकः न्यना दिसँसा ।

लिखितम धनिया नाम साम्राज्यवादीया छय् विस्तार-
वादीया काय् कल्पना नगरय् च्वंह्ये एघारौं सताब्दी जन्म
जूम्ह करपिनि कय्ता धन व्यहोरोनिया नाम चन्द्र
शम्शेरया पालय्या दासया छय् जुद्ध शम्शेरया वैठकेया
काय् नोकर जिल्लाया च्वंह्ये नय् मखंगु सालय् बूम्ह फन
फन स्यंचा जागिरदार लिहलगत चलन चलितया तका
४२०।— आखलं प्यसः व नीतका लच्छिया व्याज बिये
म्वायेक जक मखु साँवा तक नं लित बियेम्वायेक लय्लय्
पतिकं ध्यबा तयाये काः बयेगु यानागु पक्का जुल । व
ध्यवाया धितो मेपि सुयातं भोगदृष्टी बन्धकि बिया
मतयागु कार्यशीलता दक्षिणय् इमान उत्तरय् वचन
पश्चिमय् सच्चाइ व पूर्वपाखे बकादारी थुलि चार किल्लाया
दुने लाःगु कार्यशीलता भोग बन्धकि चवया बियागु जुल ।
भोग चलन यानादिसँ । सावां ति धाये दइमखु । व्याज हिं
धाय् दइ मखु । मधाःतले सावां दुगंछि जुयावं वनी, ति
धायेवं ध्यवा छगः नं दइमखु । छितः जि बःहः तयागु
कार्यशीलता गुगुं हे व्यहोरां कच्चा ठहरे जूवयाः जि
इमान्दारीपूर्वकं छुं ज्या याःगु खने दःवल धाःसा मुक्का व
घुस्साया ऐन सवाल बमोजिम छि साहुया ध्यवा जिगु
इज्जत कयाः उपर यानादिसँ धकाः जिगु मनोमान खुसि
राजी छि साहुया छेँया ववथाय् चवनाः भोग बन्धकि
तमसुक चवया बियागु जुल । न्हासं व छचनं सहिया छगू
प्रति दोहरी छि साहुयाके जि कयाः छगू प्रति छि साहुयात
बियागु जुल । थव तमसुक पास यायेगु भड्डा अदालत थव
संसारय् गनं हे मरुगु जुया निर्ति थव तमसुक हे पास याना
कयागुति भाःपादिसँ थव भव्या साक्षी चुलां चू चवनाः
खँल्हाना चवनापि छि व जि हे सदर इति सम्बत् २०३२
साल जेष्ठया ४२० गते रोज नयेदिन शुभम् ।

(सेक्रेटरीं जागिरदारयात न्हासं व छचनं
सही याकी अले जागिरदार ध्यवा कयाः

वनी)

साहु:— श्व जागिरदारं घूस नया: ध्यवा कमय
याना: कीत मोहनी बल्य खसि च्याङ्ग्रा
बी हइला ?

सेक्रेटरी:— बी हइ थैला च्वं ।

पाले:— हानं मेम्ह मनू छम्ह व:गु दु साहुजी !

साहु:— ब्वना हिं ।

छम्ह जनता:— साहुजी नमस्कार !

साहु:— नमस्कार ! छि छाया काया दियागु थें,
झासँ ! दिसँ !!

जनता:— जि बि. ए. तक ब्यनातयागु दु । लजगा:
मरु साहुजी ! छुं बन्ह: तया: साहुयाके
ध्यवा भक्ता काये धका: वयागु । फेशन
यायेमा: थौकन्हय हिप्पियागु । गर्ल फ्रेण्ड
दयेका: ल्यासेत ज्वना: चा: हिलेमा:
होटलय होटलय वना: नयेसा:, छैय्
सुकुली छनेमा:सां ।

साहु:— छि छु बन्ह: तये फु लय ?

जनता:— फेशन ।

साहु:— जब नेपालय विदेशी फेशन फुकस्यां
यनाहल उवलसं निसँ जिमिसं फेशन बन्ह:
मकायेगु याये धुन । छि सिहे स्यूगु दयेमा:
श्री ५ या सरकारं चवय्यापि कर्मचारीतय्सं
अड्डाय् वनेबलय कीगु राष्ट्रिय पोशाक
पुना: वने हे मा: याना मव्यूगु जूसा कीथाय्
थ:गु जातिय व राष्ट्रिय वस: पुनीपि ला
दइ हे मखये धुंकल जुइ न्हापा जिमिसं
फेशन नं बन्ह: कायेगु यानागु छ: । आ:ला
मकाये धुन । मेगु छुं बन्ह: तयादिसँ लय ।

जनता:— अयसा मेगु छु जि बन्ह: तये मालीसा ?

साहु:—

जनता:—

साहु:—

एकता बन्ह: तये फुला छि ?

एकता बन्ह: तयेबलय जि ठु छु नियम
पालन यायेमाली ?

बहनी बहनी ऐला त्वना: लैय् व:पि मनूत
नाप म्वा:सां म्वा:सां निहू पिकया: त्वा:
जुये फयेकेमा: । निम्ह त्यपू हे चिचीधंगु
खैय् त्वाना: नतुसुतु मयासे लां लां च्वने-
फयेकेमा: । फुसा कला:यात भ्वा सुकू
दा:थें दायेफयेके मा: । श्व नेवा:, श्व
पर्ता, श्व सैय् श्व खैय् धइगु भावना
मनूतय्के हयेफयेके मा: । मेगु गुलि फत
उलि मेलमिलाप मवइगु ज्या यायेमा:
सिल्ला छि ।

जनता:—

उखुन्हुतिनि ऐला त्वना: लैय् ला:ला:थे
हाला जुयाबलय पुलिसं ज्वनायंका: २५।-
तका दां जरिवाना यानाहल, गोरखापत्रय्
नां पिकया बिल, चिकुक च्छि तक लासा
हे मव्यूसे कुनाहल ।

साहु:—

लडाईं लय वनीपि सिपाईं त सी नं फुयें
बदमासी ज्या याना जुयेबलय छक: निक:
कुने नं यंके फु । कुने यंकल धका: ग्याये
ज्यूला भाइ । अय्ला: त्वना:, चरेस नया:,
गजि त्वना: ल्यासेतय्क सयंका मजुइकं गय्
एकता खतम जुइ ? छक:निक:ला असंयाम्ह
द्वहं सां थें लाका नयेफयेकेमा: होटल
होटलय बहनी वना: । छि एकता बन्ह:
तये धुंका: छुं नं एक जुइगु ज्या यात बा
या: जुइगु स्वत: धइगु खवर जिमि
न्हायपनय् थ्यमेव हे छित: जिमिसं बांम-
ला:गु कारवाइ याये माली ।

जनता:— जिं ला:ला:गु थ: य:गुला याना जुइ दइका मखुला ।

साहु:— ला:ला:गु थ: य:गुया अर्थ मिलय् चलय् जुया: छता सने दइ मखु मेगु छि न्ह्यागु याना जुयेफु । आ: भ्वं चवया फासं । छित: माली माली बलय् गुलिगुलि माली का: फासं, ल्हा: प्वकतं छवयेमखु, वहे तमसुक ल्यूने अंक ततं यंकैका मज्यूला ? गथे सेक्रेटरी ?

सेक्रेटरी:— फासं मेपिन्त नं अथे हे यायां वयाचवनागु छ: । ए भाइ ज्यू धया दिसं, साहुं धया दी थें ।

जनता:— जित: ध्यवा मालाचवंगु दु, ज्या मयासं नये मालाचवंगु दु । अथें ध्यवा दइगु जक छ:सा छकुती जकला छु फिकू भ्वैतय् सही तथेत नं तयार दु जि ।

(सेक्रेटरीं स्वंगु पुस्ताया नां न्यंन्यं भ्वैतय् चवइ)

साहु:— मेमेपिं नं छि थें या: जुइपि भवदूसा ववना-हया दिसं । छित: छचापं (कमिशन) नं दै, न्है भाइ ?

जनता:— ज्यू, स्वयेका ।

(सेक्रेटरीं तमसुक ववना: भ्यंकी ।)

सेक्रेटरी:— लिखितम धनिया नाम साम्राज्यवादीया छय् बिस्तारवादीया काय् कल्पना नगरय् चवंह एघारौं सताब्दी बूम्ह करपिनि कय्ता धनव्यहोरिनीया नाम २००७ सालया न्ह्योया जनताया छय् ०७ साल लिपाया जनताया काय् ०३३ सालय् बूम्ह एक बहादुर जनतां का:गु चलन चल्तिया तका रु १०००।- आखलं द्रु:छि तका कर्जा कया बापत होटल होटलय् वना: सावक नयेत व

लज लजय् करपिनि बांबांला:पि गति मला:पि म्हाय्मस्त यंकैत कषागु सत्यगु खँ छ: । श्व ध्यवाया व्याज सयकडा तका ० या दरं व्याज समेत तया: निम्ह त्यपू जूसा ववथाय् हुल्याहा मुल्याहा जूसा त्वाल्य् अले लुच्चा फटाहात जूसा देशय् त्वायेगु त्व:तू खुन्हु साँदा व्याज समेत छगू मुष्ठं चुक्ति याना: पुले हये । मेपिन्त त्वाकेगु मस्वसे इमित एकताय् हयेगु स्वत धा:सा अले देशय् त्वापु मजू खुन्हु ध्यवा पुले महल धा:सा घाराघुर ऐन सवाल बमोजिम छि साहुं थ:गु ध्यवा जिगु म्हाया थ:त य:गु न्ह्यागु कुचा लिक्का: कयादिअं धका: जिगु थ:गु हे मनोमान खुसिराजीं छि साहुया छेंया ववथाय् चवना: सुं हे किनाराय् साक्षी मतसैं छिगु व जिगु हे जक रोहवरय् तुति पालिं बँय् चुया: छयं चवय् लाका: कपालि तमसुक चवया: छि साहु करपिनि कय्तायात बियागु जुल । इति सम्मत २०३३ साल जेठ ० गते रोज ० शुभम्—

(सेक्रेटरीं धा: धा:थें भ्वैतय् सही तइ, द्रु:छि वंगु नोट छपा: कया: तिति न्ह्या: जनता पिहां वनी)

साहु:— श्व मनूया वस: व पह: स्वयेबलय्ला ज्या याइथें चवं हला ?

सेक्रेटरी:— साहुजीया मनू स्वया: बन्ह: तयेका कायेगु चलाखी नं फेल जुइला ? गुवल्य् फेल जुइ ?

पाले:— पिने हाकनं मेम्ह मनू छम्ह व:गु दु, स्वये हे वेय् पह:व:म्ह थें चवं ।

साहु:— ए सेक्रेटरी, श्व थौं - कहैयापि प्रगतिशील धा:पि च्वमि लेखक जुयेमा:का छन्त गय् चवन ? (पाले पाखे स्वया:) ववना हिं ।

सेक्रेटरी:— खये फु ।

कवि:— नमस्कार न्है साहुजी ।

साहु:— नमस्कार ! छिला थय्क स्वयेबलय् छम्ह
कविये च्वं खःला भाइ ?

कवि:— जि छम्ह न्ह्यःकथं आखः ब्वना स्वयेबलय्
कवि । लिक्थं आखः कयाः धाइबलय्
मनूतय्सं जितः विकः नं धाः ।

साहु:— छि छु बःहः तयाः ध्येबा कायेगु बिचालं
काया दियागु लय् ?

कवि:— थन एकता, राष्ट्रियता, कार्यशीलता आदि
बःहः काः धाःगु न्यनाः कबिता बःहः तयेगु
बिचालं वयागु ।

साहु:— कबिता बःहः तये धुंकाः यायेमाःगु ज्या
छु छु खः, ए सेक्रेटरी... भाइयात छकः
न्यंका ब्यु ।

सेक्रेटरी:— ए भाइ, छिला छम्ह कवि नं खत । छिला
मेपिसं स्वयाः अप्वः खँ याकनं थुइ माः ।
स्वयादिसँ भाइ कबिता बःहः तयेधुंकाः
गुवलसं प्रगतिशील कबिता च्वःसा गुवलसं
अगतिशील कबिता च्वये फयेके माः, छि
दकय् अप्वः प्रशंसावादी कबिता च्वये
सयेके माः, फयेके माः । अले छि जन कवि,
कवि शिरोमणि, कवि रत्न, राष्ट्र कवि नं
जू वयाः ततःधंगु साहित्यिक संस्थाय्
तःधंगु ओहदाय् नं लाः वये फु । अले
कबिता अप्वः क्लिष्ट जुयाः जनतां
ध्वामथूगु जुइ माः ।

कवि:— अय्सा जि सिध्दान्त नं त्वःते मालीगुका
मखुला ?

सेक्रेटरी:— सिध्दान्त धइगुला गुगु काल उगुका छि ।
वहे छगु सिध्दान्त काःगुलिला सिध्ददास
नये हे मखंकाः केहँया छेंय् सिनावने माल ।

सिनाः जक दइगु छु यायेत स्वर्ग धकाः
कवितय्सं अथे कविता च्वल जुइला ?

कवि:— अथे खःसा कबिताला बःहः तये फइमखु
जिला । न्हि न्हि वा बरोवर कविता च्वयाः
साहुयात बियेवं ध्येबा दइगु धकाः सकाः
वयागु ।

सेक्रेटरी:— अय्सा छिगु विचारका! मखुला साहुजी ?

साहु:— अथे हे ला खःनि । वय्कःया मेगु छु बःहः
तयेगु विचाः दुला धकाः न्यं धया । भाय्
बःहः तये फुला ?

सेक्रेटरी:— छि थःगु मां-भाय् बःहः तये फुला लय्सा ?

कवि:— मां-भाय् बःहः तयेबलय् छु छु नियम
पालन याये मालीगु खः ?

सेक्रेटरी:— मां-भाय् बःहः तयेधुंकाः थः मचाखाचा-
तय्त फक्क बिदेशी भाषा स्यनेगु जक मखु,
वहे भासं खँ ल्हायेगु यायेमाः मचा बलय-
निसँ । बिदेशी भाय् मचाबलयनिसँ स्यनेत
थःगु साधनं औगातं मगात धाःसा मेगु
भाय् मस्तय्त ल्हाकेगु यायेमाः । थःहंनं
बुलुहुं थःगु भासं खँ ल्हायेगु त्वःतु त्वःतु व
नेवाः जुयाः नेवाःनाप खँ ल्हायेबलय् तक
बुलुहुं थःगु मां-भाय् खँ ल्हायेगु त्वःता
यंकेमाः । अथे यायेत बुलुहुं बा, मां मधासे
दादी, भम्मी धायेगु चलन यायेमाः । तता
मधासे दिदी, वय्हे मधासे वहिनी नं धायेगु
यायेमाः । थःगु मां-भासं च्वयेगुला चटक्क
हे त्वःते फयेके माः ।

कवि:— भाय् त्वःतेगु ? हा... हाहा..... भाय्
त्वःतेगु । चखुं चां बखुं चां थःथु भाय् त्वःते
फइला ? मनूतय् वन्धनय् च्वंसातिका,

मेना, वाउंभत्तु गुवलसं गुवलसं वनं थःगु
भाय् थिःती । वनं स्यनीबलय् जक तिनि,
थय् धा, अय् धा धाइबलय् जक तिनि ।
जितः ध्यबा बियादीगु छःसा काय् ह्याय्पित्त
मेगु भाय् स्यनेगु कुतः याये तर जिला थःगु
भाय् गथे त्वःते फइ ?

साहुः— थुलि जक यायेगु धाःसा ज्यू धा कविजुयात ।

सेक्रेटरीः— साहुजो ज्यू धयादिलका । छि भचा सः
स्यूम्ह कवि लेखक जुयाः ।

कविः— तमसुकया बोलि छकः न्यने । भ्वं गुज्याःगु
थें ?

सेक्रेटरीः— भ्वंला छु फाछें पत्रका ।

कविः— फाछें पत्र धयागु छु लय् ?

सेक्रेटरीः— लित काये मदइगु कयं थःगु अधिकार फुककं
त्वःतेगु भ्वंयात फाछें पत्र धाइ । छि ऐन
कानून ब्वना तयादियागु मदुला हं
कविजी ?

कविः— मदु... ।

साहुः— उकिंला कवितयत् बागः वेँय् धाइगु, कविता
व्यवहारिक मजू धाइगु । तमल थायेबलय्
थें पतिचा संकाः, छयं संकाः कविता जक
चवयांला जुइ मखुनि जीवन निर्वाह ।
कवित धइपि कानूनय् च्वने मसः थःगु
धूनय् जक च्वने सः का ।

कविः— थ्व नकतिनि साहुजो धयादीगु खँ जिगु
छेँय् जिमि कलातं नं धाः वरोवर ।
मिसातयगु खँ घकाः मन्यना जि कलाःयागु
खँ । व्यवहारिक जुयाः ध्यबा कमय् याये
मफुगुलि हे जुइका जिमि कलाः थौं - कन्हय्
न्ह-सतकय् चाहू वइपि मिस्तथें बांमलाःगु ।

साहुः— कविजुं नकतिनि हे भचा खँ थुल का ।
जिमिसं धइथें जक छि याना यंकादिसं
लय् । अले कविजुधा कलाः नं मालासित्तां
ध्वये मफयेक बांलाना मवःसा धाः फासं
धया जिरित ।

कविः— जि धात्थें हे ह्वान्तांम मन् जुयाच्वन खनी
का । थन मवःसा थ्व खँ जि गन थुइ
का SS... जि ? कवित धयापिला ह्वान्तां
पाकः हे खनी । अयसा तमसुकया भाखा
छकः न्यने का ह्वापां ।

सेक्रेटरीः— (फाइल भ्वं लिंकयाः स्वंगू पुस्ताया नां
न्येन्यं नां तये धुंकाः तमसुक ब्वनाः न्यंकी)

लिखितम धनिया नाम साम्राज्यवादीया छय् विस्तार-
वादीया काय्, कल्पना नगरय् च्वंहा, एघारौं सताब्दी बूह
करपिनि कयता धन व्यहोरिनिना नाम छायावादी कविया
छय् प्रशंसावादी कविया काय् साहित्य नगरय् च्वंहा
कालिदास सालय् बूह जनकवि रत्नं लिहलगतं चलन
चलितयागु तका १०००१- आखलं द्वःछि त्यासा कवागुया
वापतय् मदुगु साहु पुलेत व छेँ खचं अर्थात् कलाःया पसि
न्यायेत व आपालं आपाः निह निछाः नयेत त्याना कयागु
पक्का छः । थ्व ध्यबा सुयां हक दयाः लगय् मजूगु
अंशबन्दा यानाः बियेमाःगु प्रगतिशील साहित्य च्ययेगु जक
मखु थःगु मां-भाय् ल्हायेगु फुसा त्वःते उलि याये मफुसा थः
काय् म्हाय् सन्तान दरसन्तानतयत् थःगु मां-भाय् स्य
मखुत धकाः फाछें पत्र थौंया दिनस यानाबियागु जुल ।
थनिनिसें हिजिगु मां-भाय् छि साहु थःगु धुकुती यंकाः
स्वथनाः बल्लागु तालं ग्वयाः तये यंकादिसं । अथे यायेबलय्
छं लुयाः गोलमाल देशय् जूवल धाःसा जि पूर्णरूपं
जवाफदेही जुल धकाः जिगु थःगुहे मनोमान खुसिराजि
- ल्ये १० पेजे -

ख्यालि चिनाखँ

येँ दे

सांया थःछेँ कलाःया थःछेँ

ससःसांया नं थःछेँ दुगु

धन्य स्वर्गपुरि अमरावति

तसकं च्याःगु थ्व कान्तिपुरि ।

स्वाहे मत्तःसां वसन्तपुर दु

ध्यवा पुलेम्बाःक तरकारि दु

गुबलें सात छांलाःगु मदु

साथुवाः गंसि जूगु मदु ।

थन येँ च्वं पि गुबलें सीम्बाः

कालमोचनया घात दयाः

उसायमदु पीहा महाकाल दु

वीर अस्पतालया न्हाःने ।

त्वालय् मखं मरु धायेम्बाः

वंगः बवसं त्वाः दु मखं

कतिलाके माःसा मखं धयां गाः

कलिया मन्त्र मखं, मरु ।

कालहे वःसां कालभैरव दु

सुहे खनाः ग्यायेमाःगु मदु

स्वर्ग मवसां इन्द्रचोक दु

आकाशभैरव नं नायं दु ।

रानीपुखूया दथुइ महाछाः दु

लखय् बवम्बाःपि ल्याःखाइहा

शिक्षालयया पःखाः दथुइ

भानुभक्त कवि ल्हाः मदुहा ।

हिप्पीया डेरा थनहे देसां

अशोक विनायक मदुगु मखु

गोरखनाथ नं थनहे दु

अनिकाल खनाः ग्याये माःगु मदु ।

— मदनमोहन मिश्र

सीपि मस्त गुबलें छवइमखु

तुकुचा खुसि धयाच्वंगु दु

दिल्लि मवसां दिल्लिबजार दु

नये पुने मदुसां धन्दा मदु ।

नैतिकताया प्रवचन जुइगु

सन्ध्यासीनीतय् मन्दिर दु

सधुवा जूसां विधवा जूसां

पसुपति नाथया दृष्टि दुगु ।

गणेशःया भाग लाका मनईपि

वंगः छगुलि मारवारि दु

मती तुनाथे वसः पुंकीपि

आजुद्यःया गण थनहे दु ।

सिंह महल दु, सिंह सतः दु

गजि छचिलमय् संसार दु

परिवार नियोजन सेन्टर दुसा

सन्तानेश्वर नं थनहे दु ।

कालिया गणत चाःहू जुइगु

येँ दे धात्थैया स्वर्गपुरि

रंगिचंगिपि थन दु अप्सरा

थ्व दे सकां झिलिमिलि च्याः ।

— ९ पेजया ल्यो —

छि साहुया बवथाय् च्वनाः फाछें पत्र च्वयाः छि साहु
करपिनि कय्तायात थौं बिद्यागु जुल । थ्व खं साहुं धाः
खुन्हु ऐनया म्याइय् दुने रजिष्ट्रेशन पास यानाः बिये ।
थ्व ब्वया साक्षी थ्व खँ थूपि फुककं मनूत हे जुल । इति
सम्बत् कल्पना साल कल्पना गते कल्पना रोज शुभम् ।

→ धर्क ←

अन्तरवार्ता

चवसि
व — मोहन लाल 'पांशु'
निर्देशक

ख्या: खलः, भिद्यःत्वाः, ये ।

ख्यालःस्वःतः—

प्रचन्ड कुमार प्रधान
केदार प्रसाद "लाटा"
माणिक रत्न शाक्य
शंभु नारायण वैद्य
किरणमान चित्रकार
प्रदिप बहादुर श्रेष्ठ
सुधीर बाबु खत्री

[धार्मिक उल्लेख—

छगू अफिसया दृश्य खने दइ । अफिसय
टेबल, मेच, फाइल, फोन, भव दक्क थासय
थासय तथा तइ । डाइरेक्टर छुं माला
चवनी ।]

- | | | | |
|------------|---------------------------------------|------------|--|
| डाइरेक्टर— | पाले ओ पाले पाले गन | पाले— | जि थन हे ला दुनि हजूर चस्मा तथादिसँ |
| | बना चवंगु । (घण्टी न्यायेकी) | | (तयेकी) जि थन हे दु । |
| पाले— | (भ्याः पहलं बइ) हजूर । | डाइरेक्टर— | (भ्वाःल भ्वाःल) सय व हचिसा (ल्हाःतं |
| डाइरेक्टर— | पाले थन स्व । गन ? (मिजासं न्यनी) । | | कयनाः) । |
| पाले— | गन छु गन ? हजूर निभालय पाना तइगु | पाले— | (बनी, थुइ मखु) ओ छु ओ धाःगु जुइ |
| | छुं हे मडु । | | (मनय खँ ल्हानाः) हजूर गुगु ? |
| डाइरेक्टर— | छंगु छयं गन धइगु का मूर्ख (व्वःबी) | डाइरेक्टर— | व धया व (कयनाः) । |
| पाले— | (छयं थियाः) हि हि SSS... (न्हिनाः) | पाले— | ओ जक धयां जि गय सीकेगु हजूर |
| | जिगु छयं ककुइ छःने दु हजूर । | | (स्वयाः) माय ओ मू ओ कःमु ओ छु ओ |
| डाइरेक्टर— | घत् (व्वःबी) जि सःतां मडु, छ गन | | हजूर ? |
| | धइगुका । | डाइरेक्टर— | (दना बनाः काः वःनी छगू चीज कया |
| पाले— | छु याये हजूर जि साबहे गन नये मखं, | | हइ पालेयात स्वइ) पाले अफिसय नं छुं हे |
| | गरीब सखि दां तलव मडु कलाः मस्त लही | | दुगु मखु । पाले । उखे बनाः पंच कया |
| | माः । स्वयादिसँ हजूर जि साबहे गन गंसि | | हचि सा । |
| | जुइ धुं कल । (नारि कयनी) | पाले— | हस् हजूर (बने न्ह्यः) हाइं... .. हजूर छु |
| डाइरेक्टर— | (कपाः दायाः) उह... .. छ थन मचवंसें | | धइदिया ? |
| | गन बना धइगुका उलि हे खँ मथूगुला ? | डाइरेक्टर— | पंच धया पंच (पाकु कथं) |

पाले- हजूर, गुम्ह पंच प्रधान पंच ला कि उप प्रधान पंच ?

डाइरेक्टर- उफ् जयाःह्य पिउन छहा तये हःगु । छं छु गनहे अहुय् जयाः मयानानिला ?

पाले- हजूर जिपि थें जयाःपि गरीवतय्सं काच्चाक गन जागीर नये फइ ? दरखास्त ब्यु ब्युं अन्तर्बर्ता ब्युब्युं हजूर ।... जिगु सछि दां फुइ धुंकल । बल्ल बल्ल मन्त्रीयात छहा थपाय् धिकःम्ह दुगुचा छम भोग बियाः तिति जागीर जुल हजूर । गनेछःयात भाकल तयां जागिर नये मफुत । थौं कहेला गनेछः स्वयाः मन्त्री हे तःधं खनिसा हजूर ।

डाइरेक्टर- छं मन्त्री म्हस्यूला ! (आश्चर्य जुयाः)

पाले- म्ह जक स्यूगु मखु बांलाक हे म्हस्यू हजूर ।

डाइरेक्टर- ए... (जुरुक दनाः) दिसँ दिसँ । मन्त्री बांलाक हे म्हस्यूगु का मबुला ।

पाले- यी हजूर जिम्माय् गामय् एक नम्बरयाम्ह हुत्याःया लिडर छः खुँया सरदार आःला मन्त्री जुयाः यक्वहे ध्येबा दये धुंकल आयकर अहुंला थोहे फुगु मखु । ध्येबा दत मन्त्री चुनावय् दन व छू किसान संगठन घाःगुली दनाः त्याःगु ।

डाइरेक्टर- व मन्त्री न्हापा किसान छःलालय् ।

पाले- यी... हजूर गन किसान जुइ । जमिन्दार गांधी मालिक जुया च्बंहा फिदः दां ला घूस नकाः किसानय् नां दर्ता याकूगु । अले-थ्व राष्ट्रिय पंचायत सदस्य घाःगुली दन उकी जि यक्व हे ग्वाहालि याना । छगू भोटया सछि सछि दां बियाः कया

बियागु । आःला मन्त्रीया ई नं फुइन । हानं ग्वाहालि याये मन्ति आः बिपा त्यातकि जितः सुब्बा जागिर नका बी घाःगु दु ।

(सेक्सन अफिसर दुहां वइ ।)

(फाइल ज्वना वइ) हजूर नमस्कार (ल्हाः ब्व ब्व स्थाना चवनी)

(नमस्कार यानाः) छु हइदिया ?

(फाइल कयनाः) हजूर थ्व फाइल-छयू स्वया दीमाःगु ।

आ... (झर्को चायाः) तइथका दिसँ न्यान्ह खुन्ह त्वालं स्वये ।

थ्व जरूरि हजूर ।

सरकारी ज्या न्ह्यागुनं जरूरि जुइ । जरूरि मजुगु जियाय् पेश याये हइला ? मन्त्री- जुयाथाय् फाइल पेशयाना तइगु लींछि मयाये धुंकल बःगु मखु, जरूरि मजू । (थाकु चायाः)

मखु हजूर थौं अन्तरवार्ता, अय् जुयाः हजुरयात धइगु मखुसाला सरकारि ज्या, जि थ्व फाइल वांछबया हे बनेनि ।

ए, थौं अन्तरवार्ता ला गुलि बजय् थें ?

१२ वजय् हजूर ।

आ... का ३ वजय् जक अन्तरवार्ता याना दिसँ फाइल बियाहयेका फासँ ।

(पालेयात स्वयाः) हय्, दँ । छम्ह पिउन जुयाः डाइरेक्टर साहेबया न्हःने पयेतुइगुला अनुशासन होनि । दँ (पिउन बनी)

(तं पिकयाः) छि सु... वंत ब्वः बीम्ह... हाई व सु म्हस्यूला ? (पिउन यात स्वयाः) दिसँ दिसँ । व सु म्हस्यूला

छि, मन्त्रीया मन् ।

से. अ.- मन्त्रीया मन् धयां ज्यूला हजुर स्वयेके माः
(पिउनयात स्वयाः) दें (पिउन दनी)

डाइरेक्टर- ज्यू ज्यू... चवना दिसं (पयतुइ) ।

से. अ.- अन साहेवं धयां ज्यूला दें ।

डाइरेक्टर- वं धयां दःनेगुला ... दिसं ।

से. अ.- पाले दें

डाइरेक्टर- पाले दाइ पयतु

से. अ.- पाले दें

डाइरेक्टर- पाले दाइ पयतु

लहाति कयनाः पिउन दने
पयतुइ याना चवनी

(से. अ. यात स्वयाः) छि कासं (वनी)

मन्त्रीया मन् पिउनयात दें आइम्ह अनुशा-
सनहीन ।

पाले- हजुर (स्वयाः)

डाइरेक्टर- छाया, छाया स्वयागु छ ?

पाले- हजुर जितः सकसिनं पाले पाले धाइगु छन्ह
जितः भ्वाक पाला व्यूसा छु यायेगु । जिगु
खेल छतम मजुइला ?

डाइरेक्टर- हे लाता छंगु दर्जायात घाःगुका छंगु दर्जा
हे पाले, छन्त पाले मधाःसा स्वैत पाले
धाइ । (बिचाःयानाः) थन स्व छ मन्त्रीया
मन् छःला भाइ छन्त जि मुखिया जागिर
याना बी । छं मन्त्रीयात धयाः जितः
भन्सार अड्डायाम्ह हाकिमय् सरवा याका
व्युलय् । छन्त लं सुखाः कोट लाकां नं
तया बी ।

पाले- हजुर हस हजुर धा ला धाये जि, धाःगुला
हजुर, मन्त्री थ्व ह्वासं चुयाः याना बी ।
छाय् धाःसा चुनावय् भोट कुत्के न्ह्यः
जिमि कलाःनाप मन्त्रीया कलाःत त्वाय्

चिउंगु दु । (बिचाः यानाः) तर भन्सार
अड्डाय् उखुनु तिन सचिवया सलः किजा
सरवा जुल घाःथें च्वं अयनं स्वये हजुर
(लहाः व्व व्व स्यानाः) ।

डाइरेक्टर- जितः नेशनल ट्रेडिगय्, चलचित्र संस्थानय्,
नेपाल खाद्य संस्थानय्, सांस्कृतिक संस्थानय्
जुसां ज्यू । (फाइल स्वइ) आः कासं
हन्चा छेय् अक कासं न्हि । (से. अ. वइ)
छुयाः काङ्गु ?

से. अ.- हजुर तीन बजय् जुइन मनूत फुकं वयाच्वंगु
दु ।

डाइरेक्टर- ओ हो अन्तरवार्ता मखुला (फाइलय् सही
याइ, (से. अ. यात बी) कासा थिक
याना दिसं । थुवाय् जाक मेपि निम्ह
अन्तरवार्ता काईपि अफिसरत वइ नमस्कार
यानाः पयतुइ । सकलें पयतुइ । घण्टी
यानाः पिउन सःती । (पिउन वइ) अन
मनूत ठिक जुया च्वंच्वंगु दुला स्व ।

पाले- हस् वकाः लुछाय् दें वनी

डाइरेक्टर- (कपाःदायाः) थौं अन्तरवार्ता मन्त्रीया
फोन वइ तिन का । आः कापु नइगु
जुलका ... (फोन वइ डाइरेक्टर थारा
भुइ लहाः व्व व्व स्यानाः टेबुल भागियानाः
रिसिभर काइ) हेल्लो नमस्कार हजुर सु
नुवाना दियागु थें ।

फोन- थ्व सडक ध्वस्त तथा प्रशासन भस्म
बिसाग खःला थें ।

डाइरेक्टर- हजुर छः, छः हजुर छु धया दीमागु थें ।

फोन- हजुर जि स्वीपर नुवानागु ।

डाइरेक्टर- छीः छीः ए छाया ... हाई (तसकं)

फोन— हजुर थौं जिमि कलाःया मचाबूगुलि
बिभागय् बं पूवये मफुत । अले हजुर जितः
थौं निसँ सुत्केरी बिदा माल हजूर ।
डाइरेक्टर— छिमि कलाःया मचा बुयाः छत्त सुत्केरी
बिदा बीगुला । हत् । (फोन तइ बीइ ।)
जि ला मन्त्रीया फोन धकाः ऋण्डे झाराहे
जुइत्यंगु का । का सा अन्तरवार्ता सुरु
याना दिसँ ।
से. अ.— पाले- पाले व एटम बम बहादुरयात सःति
पाले— एटम बम बहादुर श्रेष्ठ ! (सःती)
एटम— (वयाः) नमस्कार हजुर
से. अ.— दिसँ, छिगु छें गन ?
एटम— मरु हजूर
से. अ.— छें मरुसा डेरा ला दइ ।
एटम— अय् धइगु मखु छें दु, मरु त्वाल्य जुयाः
मरु धइगुका हजुर ।
से. अ.— छिगु छें सु सु दु ?
एटम— हजूर मां छम्ह बा न्याम्ह दु (पति
वयनाः)
म्येम्ह छम्ह— अबु हे न्याम्ह दुगुला ?
एटम— हजूर जिमि बा छम्ह अले तबा, माइला,
बा सांइला बा व काःछा बा ।
म्येम्ह छम्ह— धरहरा सुनां दयेकूगु ?
एटम— ध्यबां दयेकूगुका हजुर ।
मेम्ह छम्ह— कासँ ।
एटम— प्रमाण पत्रहे मस्वसेहुँ धाल बाः (वनी
पाले वइ)
से. अ.— विण्फोटन राज सि सुवाल सःति (पालें
सःती)
विण्फोटन— नमस्कार हजूर (वयाः)

से. अ.— दिसँ दिसँ ।- छिगु नां बिण्फोटन
धकाः छाया तःगु ?
विण्फोटन— हजूर ह्तापा १८ सालय् भव्छाय् वव्याचवंगु
इलय् जि मांया प्वाथं विण्फोटन जुयाः
पिहां वयागुलि बिण्फोटन धकाः नां तःगु
हजुर ।
से. अ.— ए... (थुथाय लाक मन्त्रीया फोन वइ)
डाइरेक्टर— हेलो
फोन— डाइरेक्टर खःला । जि मन्त्री नुवानागु ।
डाइरेक्टर— ओ हो मन्त्रीज्यू नागियाये ... नमस्कार
फोन— आंकन सि सुवाल धाहा अन्तरवार्ता ब्यू
वगु दइ ।
डाइरेक्टर— हजूर थनहे दु । छुयाये मालथें परमेश्वर ।
फोन— व जिमि मनू खः । चैत नियुक्ति यानाः
जित तुरुन्त हे फोन सूचं बिया दिसँ थुला ।
(फोन तयाबी)
डाइरेक्टर— हेल्लो...हेल्लो (फोन तइबी) जिल्ला आः
व सम्पादकया मनूयात नियुक्ती याये धकाः
चवनां मन्त्रीं क्वाप नया बिलका । लाः सा
आः व सम्पादकं कनय पत्रिकाय् भरमार
व्वःबिया हइ तिन ।
से. अ.— हजूर थःगु मे थःम्हं ध्यनीपि सम्पादकत
खनाः ग्याना दोमाःला । कनय वं पत्रिकाय्
छापय् याःसा कंस २५- नीन्यातकाया
बिज्ञापन बिया छुवोया दिसँ । हानं वं
कातय यानाः मखु धकाः छापयहे याइनि ।
मेहा— खःनि हजूर सम्पादकचा खनाः छाया
ग्यायेगु छु धाथें खःगु खँ ल्हाइपि ला अपि ।
खिचायात ला नकूसा छुंयात नं मऊ
धाःसा नीन्यातका दांया बिज्ञापन बिया

छवइदिसैं छितः नं ऊवइ मखु ।

से. अ.- (विस्फोटन यात स्वधाः) अं प्रमाण पत्र
छु छु कु कयना दिसैं ।

विस्फोटन- प्रमाण-पत्र नं माःला ? प्रमाण पत्र छु
कयनेगु । छगू तुलसिपत्र बेलपत्र व गोरखा-
पत्र जक दु हजूर ।

मेम्ह छम्ह- कासैं भाइ-पिने सुयातं घइ दी मते ।

विस्फोटन- जितः मन्त्रीज्यूं धाःगु दु हजूर नमस्कार
(बनी)

से. अ.- पाले आः सुथी अखण्ड सौभाग्यवति
पंचद्वीपति कुमारी सःति (वइ, फुकं
अफिसरत दनाः) झासैं कासैं नानी दिसैं ।
थुथाय् लाक्क फोन वइ

मेम्ह छम्ह- हेल्लो !

फोन- डाइरेक्टर खःला ?

मेम्ह- जि उप-सचिव, हजूर । जि डाइरेक्टर
साहेव यात बी । (फोन बी)

डाइरेक्टर- हल्लो नमस्कार हजूर सु थैं ?

फोन- जि सचिव नुवानागु आम्कन थौं अन्तरवार्ता
थैं मखुला ?

डाइरेक्टर- हजूर, खः हजूर

फोन- आकन अखण्ड सौभाग्यवति नं दरखास्त
बियातःगु दु थैं । वत नियुक्ति याना जितः
फोनं सूचं बिया दिसैं हिं ।

डाइरेक्टर- हस हजूर, खवाः खनेसाथं जिम्सं वतहे
नियुक्ति याये धकाः मतो तयागु खः हजूर ।

फोन- का धन्यवाद- (फोन तयाबी)

से. अ.- नानी छि टाइप याना दो सःला ? (थुथाय्
लाक्क सकस्यां बांलाक स्वइ ।)

अखण्ड- ओ माइ गूडनेस परफैक्टलि सः (नकल

बाखंजा

झिगू पुस्ता लिपो

छगू इलय् छह मनु दु । वया छम्ह कलाः दु । वया
कलाःपाखें वया प्यम्ह काय् व प्यम्ह म्हाय्पि दत ।
व्याहा जुइव इमि नं प्यम्ह प्यम्ह काय् व प्यम्ह प्यम्ह
म्हाय्पि दत । इमि नं व्याहा जुयाः च्याम्ह च्याम्ह मस्त
दत । इमि नं व्याहा जुल, च्याम्ह च्याम्ह मस्त दत । इमि
व्याहा जुइव च्याम्ह च्याम्ह मस्त दत । इमिसं नं व्याहा
यानाः च्याम्ह च्याम्ह मस्त दयेकल । इमि नं व्याहा यात
च्याम्ह च्याम्ह हे मस्त दत । ईपि नं च्याम्ह च्याम्ह
मचाखाचाया मांबौ जुल । वया मस्तय् नं च्याम्ह च्याम्ह
हे मचाखाचा दत । इमित नं व्याहा याना बिल । इमि नं
च्याम्ह च्याम्ह हे मस्त बुल ।

थुकथं किगू पुस्ता लिपो व मनूया सन्तान छगू अरव,
किन्हयगू करोड, खुइछगू लाख, पीछदो, च्यासः व नोप्यम्ह
दत ।

किगू पुस्ताया दुने छम्ह मनूया उलिमछि सन्तान दुगु
खंय् सुं पत्याः मजू । इमिसं हिसाव याना स्वत ।

$$1+1=2-5 \times 5 \times 5 \times 5 \times 5 \times 5 \times 5 \times 5 \\ \times 5 \times 5 = 996998928$$

हिसाव पाय्छि जुल । मनुत थारा न्हुल, ग्यात । उकिं
इमिसं परिवार नियोजन याः जुल ।

कयाः लहाः ब्वयेकाः)

से. अ.- पाले व टाइप न्ह्याःने तइब्यु । (तयाबी,
टाइप त्वाक्व दाइ से. अं. आया धाइ)
छाती ब्वः ब्वः स्यानाः हानं नक्कल कया
टाइप दाइ । गात गात नानी गात मुटुहे
हल्लय् जुइन । कासैं नानी झासैं ।

(थुथाय् हे लाक्क सकस्यां टाइपिष्ट जिथाय् तये
धकाः त्वापु खं पिकाइ ।)

→ धर्कि ←

शायरी : छपुचः

—मदनकृष्ण श्रेष्ठ

शायरी कने जि मसः स्व पासापि, कनेगु जि वानी हे मडु
कनां जक नं छु फाइदा दु थन, बांजाःपि नानी हे मडु ।

* * *

छुं मच्चःनिगु तुयूगु भ्वेतय् म्ये च्वःसां ज्यू छे च्वःसां ज्यू
ब्याः मयाःनिपि मय् जुपिन्त छिःस्वःसां ज्यू जि स्वःसां ज्यू ।

+ + +

हँय् छेय् नयेबलय् हँय् नवःथे किक्का नयेबलय् सँय् नवः
रेडियो नेपाल ला न्यने हे मयः दः न्याबलय् न्यंसां धँय् नवः ।

‡ ‡ ‡

धरग्वारा गुलि गुलि तापाकं स्वत उलि उलि हे व लठ्ठा थें च्वनी
बुरातसे गुलि गुलि त्यासेपि ब्याहा याइ उलि उलि हे उपि पठ्ठा थें च्वनी ।

+ + +

न्याय्पं कथि ला चुइ हे मज्यू तीजक चूसां त्वाक्क त्यदुइ यः
थः यःम्ह ज्वनाः नं जुइ हे मज्यू न्याथाय् हुं म्हस्यूपि धवाक्क धवदुइ यः ।

○ ○ ○

छिर्कपि फुक्कं पागलखानाय स्वःकाःसा लुइ वंय् या वंय्
जि ला थौंन्हय् थज्वःगु गंसि न्याथाय् थ्यूसां क्वंय् या क्वंय् ।

□ □ □

दुइ भुजि भुंगु खन कि दुरु नापं वांछवये मास्तिवइ
नेबाःलय् यागु खँय् म्ये म्येनेबलय् रेडियोय् फूटबल थवानाछवये मास्तिवइ ।

अले

रेडियो नेपालय् दुहां वनाः टेप फुक्क चाना व्छये मास्ति वइ
पशु संमीतकारतय् गु प्यनय् चाःतूगु न्हि चाना व्छये मास्ति वइ ।

◆ ◆ ◆

प्वाथय् अपरेशन यायेबलय् प्वाः सफा यायेत दकसिबय् न्हापां बूस बी माः
नरक पंचायतय् नकसा पास यायेत दकसिबय् न्हापां घूस बी माः ।

बःजु लीलाम

निर्देशक

भाजु रामशेखर

चर्मिपि

भाजु कृष्ण नापित व

भाजु रामकृष्ण श्रेष्ठ "हलुवाई"

रुमानः स्वःल

छम्हा — आशाकाजी थकू "अमर"

निम्हा — सत्यलाल मूल

स्वम्हा — रामकृष्ण श्रेष्ठ "हलुवाई"

(छवपया ह्यालः पुचः)

[धर्कि उलो, दबुली खाने दइ बःजु छपा ल्हानि फाकं
याक्वय् स्वतःक अले छपा ल्हानि रुमालय् मोलभेरा प्वचिड
मिछिमिछि ज्वड वयः चवनी । लिपा फाकं कुतां वानेतांगुलि
फाकं मिले यःतले गोलभेरा बाँय् वाइ, डत्याय् लाक्क हे
निह्या मनु प्याहां वइ छम्हासिनं गोलभेरा न्हये तानी]

बःजु— आसे आसे, गोलभेरा मोलभेरा । आय् काय्
थाना सो, थानासो ?

सत्यलाल— अहो बःजुला ?

बःजु— गो काय् छ छम्हु नं वःगु मखुत ।

सत्यलाल— छु यः वेगु बःजुयाथाय् ज्याजि हे मदेक ।

[थुथाय् हे रामकृष्णं तुति थवाड गोलभेरा

बःजु पाछे छवयः बी]

बःजु— आय्, नये मःगु गोलभेरा तुति थवाये मते ।

थव भित्तामीन काय् । नये मज्यू धकः

जिमिता छमिसं थव भित्तामीन मनक ।

अय्लाः नं त्वने मज्यू धकः मत्वंक, खुयः

खुयः त्वने मायेक । सेया ला नं नये मज्यू

धकः मनक, ज्यापुतेत न्याके छवये मायेक ।

आपान्हांगु ज्या दयेक गथे ज्या मर

घायानु । गोःहु मानि छं बःया लत्या ?

छं बःा तरे याये स्वःला ? नर्कें लुं थुड
तयेगुला ?

सत्यलाल— छु लत्या यायेवं हे नर्कें चवम्हा चन्द्रमाय्
रकेट थाहां वांथें स्वर्गे थाहां वानिगुला
बःजु ?

रकेटय् चवड मखु, रकेटया बाज्या हाःगु
पुष्प बिमानय् चवड वानी । छं लत्या याड
बःजुघाता दान याःसा छं अब्वाता नं
हवाईजहाजय् एअर होस्तेसतेसं पुष्प
बिमानय् अप्सरातेसं तुति तिइक स्वर्गय्
यंकी, मखुसा छं अब्वा नर्केंया नर्कें तुं
काय् ।

सत्यलाल— नर्कें धायेगु गनाले बःजु ?

बःजु— नर्कें धायेगु नं गनाथें धायेगु दःला काय् ?
नर्कें धायेगु नर्केंय क ।

सत्य— थानी जक धयः बिज्याकि अर्थात् भारतय्ला
अमिकाय् ला वा जापानय्ला गना छः ?

बःजु— छि छि छि छि, भारत, अफ्रिका, जापानया
खाँ, नर्कें धायेगु छि दू दू दःथाय् क, जलिनं
मसियाला ? आनाहे तुड चवनि क छं

बवा ।

सत्य— अय्ला पाइखानाय् जुल क बःजुं धःगु ।
आना जूसायां तरकारी माय् बियेता खि क
वैपिसं ज्यः अब्बायाता थाहे काइनि जि
छाय् लखा याड च्वनेगु मःसां स्वःसां ।

बःजु— पाइखानाय् मखुया । नर्कय् नर्कय् खि
द्वं द्वं दःथाय् धःसिनं । आंगसा छपु जक
खाने दयेक छिइ तुड च्वंम्हा छं अब्बायाता
व खि थाकाइम्हा सिनं थाकाये कै ?

सत्य— वं अभिसं थाकाये मफइगु जूसा एन. सी.
सी. एन. वाड क्रायन छगः हयः ज्यः
अब्बाया आंगसा थू कैक बलिस डा कैकैथे
कैक थाकाय् माला क बःजु । अथे जि
थाकाये बले जि छड ज्यः अब्बा मन्हेलिसा
हा हा हा । छाय्धःसा भैलःखः, बुंग छो
मवतुइ बलय् क्रायनं हे ल्हाड थानिगु ।

बःजु— क्रायनं थाकाय् फइगु मखुया, लाता,
यमराजं जक थाकाइ, यमराजं । सो लत्या
याःसा वं छं ब्वायाता स्वर्गय् छ्वयः बी,
लत्या मयाःसा नर्कय् तुं ताये तै ।

सत्य— आमु खाँया मखुत बःजु । अबले प्याखं
वयं बलय्यां स्वर्गं नं मंत, नरक नं मंत,
यमराज नं विस्यूवान धकः वयना । यमराज
छु हानं ल्याहां तुं बलाला बःजु ?

बःजु— एस स्वर्ग व नर्क मंत धकः प्याखं वयंगुलि
लत्या याये मखुत धकः च्वडाम्हा क
मखुला ? छु स्यूम्हा धकः व चुमबुग् थापा-
चिन्या जाकि खवः बःम्हा वायेगु खं
न्येनेता ? जिपुंथे न्यापु बिद्वान पण्डितया
खाँ जूसां छगु क । उल्लु क छ । करपिनि

रामकृष्ण—

बःजु—

सत्य—

बःजु—

सत्य—

बःजु—

खाँ नेड संसारं योडच्वंगु मयायेता स्वंम्हा ।

संसारं याड च्वना धायेबलय् मियतनासी-
तेखं नं लत्या याःलाथे बःजु ?

आना बःजु धायेपुं हे मरु काय् गनानं
श्राहव याड । बम्ह धायेक जन्म जुयेता
अःपु मजू । राजा माहारातेगु तुती पालि
अःपुयः अपुं छो हे खः धयागु शास्त्र दयेक
अमिता लये तायेक, कपालं ववछुक, तुति
थास्वक महायज्ञे न्हापु तिकि तिकि हायेक
तपस्या याड तिनि जि बःजु जुयः जन्म क
वयागु काय् छमिता श्राहव छगु याकेता ।
क भागि यः जिता, मयःसा म्वल क । कऽ
छं श्राहव मयः जि बःजु दयेकं ।

ज्यः अब्बा सिये हाँ हे वःजुं वासः अःप
यायेमते लत्या याये मऽ धकः धः बिज्याःगु
जूसा ज्यः अब्बायाता दांछिया हे वासः खर्च
यायेगु मखु । अऽ फुकं खर्च जुल छुयाय्
बःजु ?

छं छं ब्वा स्वर्गय् छ्वयेगु स्वःम्हा मखुत
काय् । करपिनि करपिनि छेँ बुँ बाःहा
तयः थः फल्चा बाय् च्वडानं सीम्हा बौ-
याता स्वर्गय् छ्वता । जुजुपुं सीबलय् नं
सँला, किसि, मोटर धःधःगु दान याड
कात्या नकला । छं कात्या मनकसां लत्या
याड भवय् मनकेगु जिता ?

बःजुयाता भवय् नकसा यां जिजे ल्वय् वयः
फल्चा बाय् जक लाइ मखु मथां अर्धजलय् हे
च्वं वाने मालिक जि ।

मस्या काय् वयां । अर्धजलय् च्वं वांसां
जिं छुं धायेमखु तर लत्या मयात धःसायां

त्वःते मखु ।

सत्य— अहो ! बःजु आमुयां ध्यबा काये दःह्या साहुं ज्वनिगु स्वयः नं चर्को जुइक ज्वननि जिता ।

बःजु— साहुं राहुं ज्वनिगु स्वयः नं चर्को जुइ काय् बःजुं ज्वनिगु । छं लत्या मयात धायेवं यां बम्हू धायेक जन्म जुयः चवडागु छु शोभा दतानि । सुम्क थोत्रो जुये धुंकगु बम्हू जात लीलाम जुइगु दः, बढी बढाउ यः वा धकः गोरखापत्रय सूचना ब्यूसां जिल काय् ।

सत्य— मखु बःजु अः जिता खू हुं धयागुला ? खू वानेगुला ? सुख साख मरुगु खाँ लहाड च्वनी ।

बःजु— खू वाने ग्याःसा छं खुयेम्बः । छाया खूवाने मःगु दः । बयेक थें न्यापुं पासापुं दहे दः त्याये बिहे बीनि ।

रामकृष्ण— त्याये बियेगु ज्या जिगु ला ? बःजुया नं खाँ लहाडगु । एन. आई. डी. सी व नेपाल बैंक थिजपुं दहे दः, कःवा कःवा धकः हाल च्वंपुं । आनाहे कःहुं । डारो मःला हिरो मःला ?

सत्य— त्याये ब्यूसायां हिरोहे जूसां त्याये, तर लत्या याड सरकारपाता छु फाइदा दः धकः त्याये बी ?

रामकृष्ण— बःजुयाला खाने दयेक फाइदा दःसा सर-कारवात खाने मवेक फाइदा दः सिलला छं ? आहुद सरकारपाता फाइदा बरसा परिवार नियोजन यथे आहुद नं नियोजन याड छवतक काय् । बर कीसं हे आहुद नियोजन याड धकः सरकार थरथरीक

काय् । पञ्चायतय पञ्चायतय ध्यबा बियः बाखं कंक तःगु । गना गनायापुं योगी महर्षित वडबलय् छंता जिता स्वःतुक्क प्येक अमिता बासालयः स्वागत याडच्वंगु सरकारया ज्या मरुयः याड च्वंगु धकः चवडाला ?

बःजु— धरोग्वारा बःहाकगु खाँ छाया माला ? बिकास धालकियां सरकार मिखा तिसिड दां त्याये बियःच्वंगु दः । छं नं आहुदया बिकास याये माला धकः डारो खुरो बैंके दां त्याये कःत यां खाँ हे चबूनि ।

सत्य— आना अबलय् नेपाल बैंक सांस्कृतिक कार्य-क्रम कयबलय् ख्यालः कयपिता ध्यबा बिये धःगु आःतकं मबूनि हँ, बःजु न्याबलय्क वासां थाना जिमि ध्यबाया खाँ त्वापु जुयः च्वना धाइगु हँ । ख्यालः कयपिता बिये मःगु निसः स्वसः दां बियेता हे आपामछि हांगु नेपाल बैंकय् त्वापु जुयः च्वन धःसा आहुदया बिकास यायेता हिरो हिडारो दां त्याये क वानेबले आसे जिमि थाना गोली हाना हान जुयः च्वना मभाइला ?

बःजु— अय् अय् अय्, आसे आसे ।

सत्य— छाया, ग्याडागुला बःजु ?

बःजु— आमु बन्दुक नि कोस्वकि काय्, ग्याडा जि कयः कहु कोस्वकि ?

सत्य— थव बन्दुक मखु, लहाड तनि रहाः ।

बःजु— छः जि सिया । बन्दुकया तां कायेवं हे ग्याडास्हासिता बन्दुक थें न्याःगु लहाः खानेवं मभाइला जि । कया कोक ?

सत्य— अहोसा, अयसायां बःजुपिता ध्यायेतायां
बन्दुक हे भवः, बन्दुकया नां जक दयेवं हे
गाः क खःला ?

बःजु— जुजु खड मय्याना जिपुं ! पाप धर्म खड
मय्याडा तर बन्दुक धाल किं सातु हे वां
जिमिगु ।

राम— भियतनामय् जूसायां बःजु बुये मलाकं हे
बन्दुकया सःन्येड प्यायेसं सित जुइ खःला ?

बःजु— अथे सी धकःयां बःजुपुं छहा नं भियतनामय्
जन्म क मवांगु । थाना जूसा शान्तिया
देश काय् । थिके जूसां जुलुस मरुगु देश
क । बिद्यार्थीतेता सिक्क केलः तुकुचाय्
बांछवपुं ज्यानमारात तुरुन्त त्वःतिगु देश
क । कयेता बियेगु दयानं सकस्यां कयेता
मरुगु देश क । थाना जूसा बैकय् त्याक,
आहद याक दान काये दंगु देश क ।

सत्य— बैकं धवा त्याये बी मखु छु हाल चवडागु
बःजु ? बैक छु धवांयम्हाला ? लाताम्हा-
ला ? कर्मचारितेगु लय् लय्या धवा कयः
चव्हा संचय कोषयां बेबलय् म्होचा
कायबलय् अपः कायेगु खां स्यू । जि बैकय्
धवा कायेता डारो कायेगु जूसा हिरोया
जथा तये मानिक अले जक बी ।

राम— खः बःजु धव खाँयां । जि स्वये यदि
ध्यायेता लत्या याकेगु जूसा बःजु हे त्याये ब्यूसां
छु जुइ ? जजमान उद्धार यायेगु बःजु
पिनिगु धर्म हे खः । बःजु त्याये बियः बःजु
हे दान कायेतायां खःनि ।

बःजु— आमु खाँयां मजिल काय् । जि तुं बियः
जितुं दान कायेगु कात्या नयेगु बराबर

मखुला काय् ? थःमं त्याये बियः थःमंतुं
दान कायेगु छु धर्म शास्त्र दः ? जथा
दःम्हा जूसां छगू क ।

सत्य— बःजुं सां बियः बःजुंतुं दान कायेगु धर्म
शास्त्र दःलाते ?

बःजु— अयसा छं लत्या याइमखुत । छं आहद
याये भवःल । लिपायागु छं मस्वत भवःहे
भवःल । अः छं आहद याःसा छकाय् छं
व्वा स्वर्गय् वाने दे । स्वर्गय् वानकियां
स्वर्गयाम्हा जुजुया चाकरि बाड लिपा
मंत्री धायेक जन्म क बैगु मखुला छं व्वा ?
छं व्वा मंत्री धायेक जन्म क वलकिया छ
मंत्रीया काय् ।

राम— मंत्रीया काय् जुलकिं आखः हे व्वने भ्वाय्कं
सर्टिफिकेट दे, छंता, लाता प्याउ खवः वःसां
अमेरिकाय् प्लानय् वाने खानी । अमेरिकानां
त्याहां वल किं थाना डाइरेक्टर क छ ।

बःजु— मंत्रीया काय् जुलकिं यःयःपुं मिसातनापां
लभ याये दे । लभरयाता मोटरे तयः
गोकर्णय्, गोदाबरीया समरपालेसय् वानी
छ ।

राम— समरपालेसय् वानिबलय् मयोम्हा मनू-
सिता सिक्क केलि छं ।

बःजु— सिक्क कयःसां कानूनं छंता थो मखु । क
अः छं सरकार थिके यःगुली थिकेयाता जक
धयः छं, छंता रसबरि घुतुं किथें सरकार-
याम्हा कानूनं नैला मनेला स्वयः छं ?

सत्य— व खाँयां खः बःजु । तर आहद याड न्यः
अव्वा स्वर्गय् बानिगुली जिता विश्वास
वहे मरु, गथे याये ? जियां याये मखु,

ज्युसा मेपिता नं याकेम्हा मखुत ।

बःजु—

छं मयःसां मेपिता छाय् यायेम्बः धायेगु ?

खबरदार छं मेपिता धाये दं मखु सो ?

(वानेतानि)

राम—

भागियाये बःजु ?

बःजु—

म्बःल काय् छं नं भागियाये म्बःल । (वानि)

सत्य—

आहा काय् छयां खासाम्हा खः काय्, ब्रम्हं धायेपुं लोभी धायेगु सिक सिकं आद्व याये मः धकः हाल च्वनिम्हा क “भौयाता धौ पासा” धयतःगु नायं दः “जहाँ केरा वहाँ बाहुनको डेरा”, “जहाँ गुलियो वहाँ बाहुन भुलियो”, “जहाँ दहि वहाँ बाहुनको सहि”, “जहाँ अचार वहाँ बाहुनको बिचार ।” छं जक भ्वय् नयेगु जूसा थ्व लत्या लित्या छाय् माला ? आर. सो. वड ममचा नयेगुला ? दक्षिणकाली पिकनिक वड भ्वय् नयेगुला ? मिन मिङ्ग वड चाउ चाउ नयेगुला ? गुलिस्थानय् वड प्लाउ नयेगुला ? वा रत्नपार्कय् च्वड बरांचा नयेगुला ? छं जक नयेगु जूसा गुलि खर्च याड नये ? जिके छु धेबा मरु धकः च्वडाला ?

राम—

अहो, छ जि धयागु खाँय्पत्यः जुयः च्वडागु क मखुला ? जियां बःजुयाता हायेकेता सकाय् छंता आद्व याये मः धकः धयागु । कनु ???

बःजु—

हाई, आसे आसे आसे आसे ।

सत्य—

छाय्, वाने धुं कम्हा बःजु हानं वयागु !

बःजु—

छमिसं स्वयेबलय् जि वान धक च्वडाला ? वाने थै याड सकाय् वाडागु । छमि छु छु

खाँ ल्हाइ धकः नेड च्वञ्चतिनि । छं अथेहे नकेगु मनसुवा जूसा जिता नं व्वड यंकि । मेथाय् मेथाय्यां वाने ग्यां काय्, व गुलि-स्थान धःथाय् वाने मन्यां काय्, आनायागु प्लाउ साबहे साः धःगु । ब्रम्हयात नकागु नं पितृ नकागु बराबर खः । छाय्धःसा ब्रम्ह तय्के नं पितृ दुबिड वो । छंवा तरे यायेगु जूसा कनु व्वड यंकि ।

सत्य—

आमु खाँ ल्हायेम्बः बःजु । सीम्हा मनू म्वाम्हासिके दुबिड वो धयां सु पत्यः जुइ । ज्यः व्वां नःवइ मखु । सिये धुं कम्हासिनं नं नः बइला ?

बःजु—

नःकयां स्वः पितृ दुबिड नःला मनःला । व खाँयां जि नयेबलय् सी, अःपः अःपः नःसा पितृ नःगु धक सीकि, म्होचा जक नःसा जि नःगु धकः सीकि । ब्रम्हंता नकागु गनां वानि मखु काय् पितृया म्हुतुइ लाइ । स्याला ?

सत्य—

अः जि बःजुया खाँ नेड बःजुयाता नकसा बःजुंहे जक नइ पितृ नये खानि मखु । खःला काय् ? क वान क बःजु बाई बाई ।

बःजु—

आय् सुथाय् स्पलनिसें बिछुक यायेगुसा काय् ? छमिसं रसबरि छगः च्या छगू कःपयां त्वंकि ।

सत्य—

होटेलय् बिज्याकि बःजु आना जूसा धः धःगु दः जिपुंयां वान क ।

बःजु—

छपुं वानिगु जुःसा जिता जक छाय् थ्व

(त्यै त्यूने)

तं चाया दी मते

- भगवान दास श्रेष्ठ

तं घयागु तसकं ग्यानापु । तमय् मनुखं न्ह्यागु नं यायेफु । भिगु ज्या यात धाःसा ला बांहे लात । तर तमय् न्ह्यापु थासय् मलाइगुलि अप्वःसिनं मभिगु ज्याहे जक याइगु । करपिन्त ब्वः बीगु, न्ह्याय्कं तछ्यायेगु, कलाःयात दायेगु, पुखुली ब्वब्वानाः सीगु, त्वायेगु, विष नयेगु आदि फुक्क मभिगु व बांमलाःगु ज्या मनुखं तमय् हे जक याइगु ज्या खः । उकिं ह्नापां ला तं मचायेगु हे भि, तं चाल हे धाःसां तमय् छुं हे ज्या मयायेगु भि । छुं जुयाः तमय् छुं मयासे च्वने हे मफुत धाःसा न्हापां ब्वय् न्ह्याथनागु ज्या नि याना दिसैं ।

१. तं वयेवं हे १ निसैं १०० तक तरं निना दिसैं ।
२. स्त्रःगु मुका पयना दिसैं अथवा मस्त्रःगु मुका स्वयेका दिसैं ।
३. स्पीरिट वा अय्लाः भचा तयाः न्ह्याय्कं हुया दिसैं ।
४. ख्वला मप्वसे बरा भपा दिसैं ।
५. कलाःयात थःछे छवया दिसैं ।
६. चःबो वनाः 'राजमति' म्पे हाला दिसैं ।
७. तिनिछयल्य् वनाः याकःचा भकुंग्वारा ह्यिता दिसैं, भकुंग्वारा गुलि फत उलि च्वय् जक थ्वाना दिसैं ।
८. रेडियो नेपाल ह्ययेका तयागु दुसा रेडियो स्थाना जक दिसैं तछ्याना दी मते ।
९. वसः वा सफू खुना दी मते, खुइ हे माःसा गोरखापत्र जक खुना दिसैं ।
१०. हिति धालय् स्वःलहुया दिसैं ।
११. दर्शन शास्त्रयागु सफू व्वना दिसैं ।
१२. ब्रह्म त्वाका दिसैं ।
१३. साहु पुजे माःगु दुसा सुयात गुलि गुलि पुजे माःगु खः लुगंका दिसैं ।
१४. गुलि फु उलि कः कःवत त्वना दिसैं ।
१५. अल्जेब्रायागु हिसाव याना दिसैं ।
१६. ब्वथ सफा याना दिसैं । १७. छुं न्ह्याया दिसैं ।
१८. वेल्जुन वा च्वाप्वन्वा फुक्क तग्वयेक पुया दिसैं ।

१९. च्युईंग गम् न्ह्याया दिसैं वा छाःगु दुरुब्वः नया दिसैं वा चाइनीज टूथपेस्ट तयाः नायूगु जापानीज टूथब्रसं वाय् बुया दिसैं । थुलि यानाः नं तं ब्वमलात धाःसा
२०. छन्हाः फंसफंस छना दिसैं, म्हगसय् छुं हे म्हंका दी मते ।

तं वयाच्चवनीबलय् याये मज्यूगु ज्याया धलः ब्वय् बियागु दु ।

१. कलाःयागु ख्वाः स्वये मज्यू । २. सुं नाप हे नुवाये मज्यू ।
३. रेडियो नेपाल न्यने मज्यू ।
४. गोरखापत्र व्वने मज्यू ।
५. नेपालयागु गुगुं नं अड्डा अदालतय् पलाः तये मज्यू ।
६. आधुनिक कबिता व्वने मज्यू ।
७. बाखं वा उपन्यास च्वये मज्यू ।
८. हिरायागु अंगू न्ह्याये मज्यू, हिरायागु तपं सुइ मज्यू ।
९. ग्वाय् दारि खाये मज्यू
१०. मोटर, साइकल, बस, हवाईजहाज छुं हे गये मज्यू ।
११. पुखू, खुसि, तुं व समुद्रया सिथं वने मज्यू ।
१२. थ्वं, अय्ला त्वने मज्यू । गजि, चरेस न्ह्याब्व त्वसां ज्यू ।
१३. छुं हे वासः नये मज्यू ।
१४. कःसां, पत्नी व पर्वतयागु च्वकाय् वने मज्यू ।
१५. कलम, चक्कू, सलाइ, लमइटर नापं छुं हे हलियार स्थाना जुइ मज्यू ।
१६. धयवा काये दुपिन्थाय् धयवा काः वने मज्यू ।
१७. ससल्य् वने मज्यू । पसल्य् च्वने मज्यू ।
१८. पाउं पातु नये मज्यू ।
१९. ततःधर्पि मन्त नपलाये मज्यू ।
२०. बमलर्पि नाप त्वाये मज्यू ।

थुलि मयासे च्वनाः नं पुखुली ब्वब्वानाः सी हे मझि वल धाःसा तजानु पुखुली ब्वब्वाना दी मते चिक्कानाःगु पुखुली जक ब्वब्वाना दिसैं । छिगु तं ब्वमलाइ हे मखु ।

ख्याल:या न्हचस: ख्यालं लिस:

१. रामशेखर, दिना चवें, खवप ।
 — '१२ बजय्' 'अस्पतालया जा' नलकि 'स्वर्ग व नरक' मध्ये गन लाइ ?
 ~ अस्पतालया जा नःम्ह नं छिहे, १२ बजय् सोम्ह नं छिहे, स्वर्ग व नरक दयेकूम्ह नं छिहे जुसॅलि 'अगति' जुया: 'सिमात फफस्वः'गु 'छगू देशय्' जक लाना चवनीका छि ।
२. हितकरवीरसि कसा:, जनता स्वा: त्वा: ।
 — जिमि व्वां बांलाक बिचा: याना: हे जिगु नां हितकर तःगु जुया चवनका ।
 ~ अं, घात्थें हितकर मतसे हिटलर तःगुसा छु जुइगु जुइ हला ?
३. बुद्ध साय्मि, वाड्डुङ्ग ।
 — जिगु श्व कविता छपु छिगु पत्रिकाय् छापय् यानादिसं:—
 'जि'
 शहीदया मिखाय्
 लाशया बजारय्
 मय्याइ गथे छ्यॅल्य् ?
 जि टेवहा:या मचा
 भियतनाम
 तिनिल्य: ।
 घा:या म्हुतुसि

- हि भ्या:गु अंग:
 न्हू-सतक नांगा
- ~ श्व कविता ला प्रा. माणिकलाल श्रेष्ठ भूमिका चवयातःगु 'जि : जिगु वर्तमान' सफुति खुया कयातःगु छ्यंया छ्यं जक ख: ।
 ४. गिरिजाप्रसाद जोशी, कवस्व दे ।
 — ल्याय्म्ह पुचःया ग्वसालय् जूगु आलोचना गोष्ठीस जि जनवादाया विरोधय् नवानागुली सुनां सुनां छु छु धाल थें ?
 ~ जनवादीतय्गु ल्हाती शासन लातकि सीका छि !
 आ:ला सुनां छु धाइ धका:, धाहे धा:सा जिन्दावाद खना: ग्या:म्ह मूर्दावादाया लेंय् वनाचवन धाइका ।
 ५. सुवर्णकेशरी तुलाधर, महसूर, भारत ।
 — जिगु 'गुंचव मू पुली' धंगु मू पुलला थें ?
 ~ आम्कन इन्दिरा गान्धी नापलाना: न्यनादिसं ।
 ६. बंकुठप्रसाद लाकौल, महाबुद्ध ।
 — नेपाल भाषा भ्रूटाचार आयोग दयेकेगुली छिकपिनि ध्यान मवंगुया कारण छु ?
 ~ नेपाल भाषा भ्रूटाचार आयोगया आजम्भ नाय: जुइम्ह हे छि जुसॅलि मा:गु ग्वसा: छिहे ग्वयादिसं ।

७, आशाराम शाक्य, दां लखु, यल ।

— 'महि छपा' नइम्ह 'पोहिचा' व्याहा यायेकि मयाये धंगु खेंय जिगु नुगल्य 'अन्तरद्वन्द्व' जुया-चवन छु याये ?

— कलाया 'तज्याःगु चुरि' खंम्ह 'जितः न्हिले मास्तिवल' धायेया पलिसा कलाः 'हिलाबुला' यायेगु हे मि जुइ ।

८. राजा शाक्य, सुकुलि धूकू ।

— जिगु 'मतकी' बाखं सफू छगूहे ल्यं मन्त ।

— छेंय लहिनातयाम्ह न्यायात नका दियाला ?

९. पूर्णबहादुर वैद्य, ग्व छें ?, छवप ।

— कविता थुइके अःपुगु जुयेमाः धकाः न्ह्ये अःपुउ जुइवं हेम्बः मारि जक नाकेगु पक्षय् जिपुं मारु ।

— नांया बाजि न्ह्यः वा त्वधुइ धुंकाःयागु खां ला माखु थें च्वां नि आमु !

१०. धूस्वां साय्मि, नु बिल्लो, भारत ।

— हिन्दी भासं पिहांवःगु जिगु निगू न्हूगु उपन्यास छिर्कपिसं ब्वना दी धुनला ?

— छगू 'फिसःया लिसल' यहे ब्वने धुन, मेगु ब्वनेत नेपाल भाषा व हिन्दीया शब्द कोष छगू दयेकाः छवया हयादिसं ।

११. प्रेमबहादुर कसां, केला (रा) त्वाः ।

— सम्बिधान सुधार आयोगयात छु सुकाव ब्यूसा जिगु मि जुइ ?

— 'स्वां पुचः' पत्रिकाय् पिदंगु छिगु 'पंचायतया महत्व' नांगु च्वसु जक ताहाक्येक च्वयाः बियादलं, मन्त्री मखुसा पंचय् सां पक्काहे ल्यइ छितः ।

१२. रत्नध्वज जोशी, खाग बहाः, यल ।

— १. या वरषा बारिद ! जलधार

२. ग्यानापुगु साहित्य च्वयेमते यार !

— चुइकेत वइतिनि खुसिया धार पनेत स्वयेमते खबरदार !

१३. चिनियालाल बज्राचार्य, तानसेन, माल्पा ।

— जिगु उपन्यासयात 'श्रेष्ठ सिरपाः' छाय् मवःगु ?

— करपिसं बीगु 'श्रेष्ठ सिरपाः' काये सिबय् 'बज्राचार्य सिरपाः' तयाः थःतहे कयाछूसा खेंहे मन्त नि !

१४. भिक्षु सुदर्शन, स्यंगु ।

— भिक्षु त्वःताः 'की' पत्रिकाया सम्पादक जू वये दइला जि ?

— जिला ज्यू छि, तर छि मति खं थें गृहाश्रमया सुबिधा दइमखु का वरु ।

१५. मथुराकृष्ण साय्मि, थन म्हिति ।

— जि बाखं च्वयेगु त्वःताः उपन्यास च्वये धुन नि, मस्यूला छि ?

— छह्मस्या नामय् बाखं, मेम्हस्या लागि उपन्यास सा आः हाकनं मेम्हस्या लागि महाकाव्य च्वया दीगुला छि ?

१६. योगेन्द्र प्रधान, ठेक्का पुखू, छवप ।

— जिगु भाषण छिगु पत्रिकाय् पिकया दीला ?

— जिमिगु रासनया ठेक्का छि कयादीगु छःला ?

१७. रामभक्त श्रेष्ठ, खवंत (खं) ।

— जिगु 'लुसि त्वाकेगु' सफू याकनंहे पिदनीगु दु ।

— थव नापं १२ गू सफू पिदनीगु खें न्यनाः लय्ताः वः, आःतक छगूहे पिमदंगुली दुःख ताः ।

१८. केशरमान 'व्यथित', ज्याखुं, छुस्या बहाः ।

— नित्यु कोरियाय् वना वइबलय् छत्थुं जि समाज-वादी जुया बिया, ठीक मजूला ?

— सरासर व्यथिक (वेठोक) ।

१९. मंगलप्रसाद श्रेष्ठ, ग्वंगः त्वाः ।

— जि सफल निबन्धकारजूग्या मू कारण जितः
ल्यासेतसें द्रहं वाःगुलिं खः, छिं स्थूला ?

~ अय्हे खःसा हाकनं छकः गधा धायेकेगु कुतः
यानादिसं ताकि सफल आलोचक नं जुइफइ ।

२० चित्तधर 'हृदय', ग्यात, दुं छे ।

— 'चीन लुमलाः' 'पाकःमिया चा' चवया, 'नेपाल
भाषा साहित्यया जातः' चवयेत 'मि मनः पौ' व
'डायरी' स्वया, 'नेपाल संगीत' व 'नेपाल
संस्कृति' 'ह्वनागा' य् प्वःचिना, 'थाय्भु' हे मनसे
'हृदय कुसुम' चवया, आः 'छु चवये' ?

~ 'बस स्टाण्ड' य् लनाः 'श्व नं जिमि वेंतहे'
बियाब्यु धकाः 'फोटोग्राफरयात' 'स्वां' जक
बियादिसं ।

२१. हरिशंकर रंजितकार, ग्याः बहाः ।

— जिगु 'कंगाः' यात मग्युसं मगाःगु 'श्रेष्ठ सिरपाः'
बल्लाःम्हं लाकाकाल छु याये ?

~ चाकडि मयासे 'पाकः मिसाया भाःत' जुया
चवसेलि ?

२२. सिद्धिचरण श्रेष्ठ, पुलां भम्चा ।

— छिकपिनिगु सफुती भूमिका चवयेमाःला ?

~ चवयाः छवया हयादिसं, सफू पिदनेव बी हये ।

२३. धर्मरत्न 'यमि', बुलां क्वः ।

— जि भाषण विक्व पतिकं 'छेय् छेय् मस्तय्त
नेवाः भासंहे खँ ल्हाके माः' धायेक धायेकं सुनांहे
छाय् वास्ता मयाःगु ?

~ सकस्यां छेय्चव्ह मिसा खय्नी जूगुलि ।

२४. सूर्यबहादुर 'पिवाः', धवप छे ।

— 'पत्नी परमेश्वर !' 'गल्लि खिचातय् सम्मेलन'

य् 'चःबिया व्यापार' याःवने नु !

~ चःबिया व्यापार याये सिबय् अःखतं सिमा गयाः
'ह्रस्व दीर्घयो' म्ये हाःसा बांलाइ ।

२५. दुर्गालाल श्रेष्ठ, छेरावति ।

— जि आत्मालोचना यानाः इनाप याये, — "यनि-
निसं जितः कवि मखु ग्यानापुम्ह बि धयादिसं ।"

~ तिस्यः तिस्यः जक ल्यं दनिसां गय्

दुर्गा आः नं दुर्गा खः

मन्त छिके आः कविता मन्त

अय् नं नां छिगु कवि हे छः ।

—○—

★ दकलय् बांलाःगु न्ह्यसः तःम्हसित

१००००१-तकावंगु चेक बीगु दु । च्यान्हया

दुने चांमुन्दा प्रेस यतछाय् काः झासँ ।

(२१ पेजया ल्यं)

ब्रम्ह जात मानि । श्व बःजु धायेगु जात
छुयाता अः सुनं आहद हे मयाइबलय्, आय्
यानासो ? याना ? क लीलाम याये त्यल
क लीलाम बोले यात क । ब्रम्ह जात
सुयातां मःला ? सुयातां मःला ? पाँच
रुपैया— १ (एक) पाँच रुपैया २ (दुई)
क तीन धाये त्यल, लिपा पछुताये माली,
अः जुत्तले लाःनि । जियां तीन धालक, पाँच
रुपैया ३ ... (तीन) क सो सुनं हे मधः क,
यःहे मयेल ।

○ धर्कि ○

अस्पतालया जा

- रान शेखर

(धकि उलो । खःथें मखुथें च्वंक अस्पतालया छगू बाड्य
छह विरामी छयनं निसें तुती थ्यंक गां त्वपुयाः छगू
खाताय् देनाच्वंगु खनेदै । विरामी फितिक हे सनी मखु ।
भमभुं कम्पाउण्डर वें । विरामीया ख्वाः मउइकुसैं फांगाया
डुने लहाः दुछ्वयाः थःगु नाडी च्वंगु घडी स्वस्वं हाला हें)
कम्पाउण्डर- आगछिया स्व स्व स्व, गपासकं ज्वर

याजाया च्वने धुंकल । आः जिल आः ।
स्व नारा सांगु धुक धुक धुक । साव
च्वापुकाः छ । धाया खँयां नेनिगु हे मखु
(कम्पाउण्डरया ल्यूने तीजक छह विरामी
दं वें । वयात कम्पाउण्डरं खनी मखु । व
नाडी स्वस्वं थःगु तालं हालातुं च्वनी)
आः खनं जुये तिनिला छ उखे थुखे ?

(खाताय् ग्वारा तुलाच्वंह विरामीं छुं
लिसः बिइ मखु, तर कम्पाउण्डरया ल्यूने
दं वःह विरामीं लिसः बिइ)

विरामी- जुये मखुत हजूर !

(थःगु ल्यूने लिसः ब्यूगु कम्पाउण्डरं
वाःचाइ मखु, वं स्वये खाताय् च्वंह विरामीं
लिसः ब्यूगु धकाः थःगु हे ताल्य हाली)

कम्पाउण्डर- लाको थाको नये तिनिलाले छं ?

विरामी- नये मखुत हजूर !

(खाताय् च्वंहस्यां नवाःगु मखु, तर
ल्यूने नवाःगु थें कम्पाउण्डरयात थुथाय्
लाक च्वनी । व ससंकट जुयाः लिफः स्वं ।

धायें खेक हे ल्यूने विरामी देनाच्वंगु
खनाः व आलांचा जुइ)

कम्पाउण्डर- (ग्याःहथें लिलिचिलाः, विरामीया ख्वाः
स्वस्वं) अय्, छ, जिगु ल्यूने च्वनाः हाला
च्वनागु लाकि, थ्व खाताय् ग्वतुलाः नुवाना
च्वनागु ?

विरामी- जि खाताय् ग्वतुला च्वनागु मखु । जि छिगु
ल्यूने देनाः हे नवाना च्वना ।

कम्पाउण्डर- (अजुगतितुं चायाः) धायें खःला छ जिगु
ल्यूने देनाः हाला च्वनागु ?

विरामी- छि खनाहे च्वंगु दःनि जि खाताय्ला छिगु
ल्यूनेला धयागु । छिता ह्येकाः धायेमाःगु
छु दः ।

कम्पाउण्डर- (अजुगतितुं चायाः) वहे खः बाना जि
थुइके मफयागु, छ खाताय् ला जिगु
ल्यूनेला धया । धायें छ जिगु ल्यूने च्वनाः
हाला च्वनागु खः सा थ्व खाताय् ख्वाःछी
खने मध्येक गां त्वपुयाः ग्वारतुलाच्वंह
मुलेसा ?

विरामी- ववां जि मसिया हजूर !

कम्पाउण्डर- (थाराक बनाः ग्याइ) हाई छं मसिया !
धायें व खाताय् देनाच्वंह छ मखुला ?

विरामी- जि मखु धया व खाताय् देनाच्वंह, जिला
जि वन मखंला छि, गन खाताय् धकाः ।

कम्पाउण्डर- अले थ्व खाताय् च्वंह सु जुलले ? जि

सुयागु नारी स्वतलेसा सय् ।

(कम्पाउण्डरं चवतुडक फांगा साला काइ ।

खाताय् ग्वारातुला च्वम्ह मनू खँ मखु, व

ला फुंग, बाय्ग व मेमेगु पेय्बः न्याय्बः जक

जुइ, कम्पाउण्डर तसकं हे अजुगति चाइ)

कम्पाउण्डर- अहो थवला मनू मखु । गय् थव, न्हाच धाःसा

जि जाना जान छंगुहे नारी ज्वनाः ज्वर

स्वयागु ! फांगां त्वपुयाः देना च्वम्ह छ हे

जुइ धकाः चवनागु (तं पिकयाः) छं धों

लातका जित, स्वाहे स्वाःलका । छ गन वना

वयाम्ह ? का धा छ गन वना वयाम्ह ?

विरामी- सिनेमा स्वया वयागु कम्पाउण्डर साव !

कम्पाउण्डर- (तमं) विरामी हँ धायेबलय्, सिनेमा स्वः

जुये फः, छु धायेगु !

(अवले हे छम्ह मेम्ह विरामी वहां वं

'आया... आया...' हाहां प्वाथय् ल्हाः त्पुत्युं)

मेम्ह विरामी- आया... आया... आया

कम्पाउण्डर- (ततःवःगु मिछां स्वयाः) छु जुला धकाः

छ आया... आया... हाला वयागु ?

मेम्ह विरामी- स्याता । आया... आया... । डाक्टर

साव ग्व ? गना छाला ? आया...

कम्पाउण्डर- छु स्याता छंता ?

मेम्ह विरामी- न्हागुसां स्याताक । आया... आया... ।

ग्व डाक्टर साव गना दीर्थे ?

कम्पाउण्डर- (तमं) डाक्टर साहेव छाय् माला छंता ?

मेम्ह विरामी- (तमं) केनेमालाक, आया... । स्याता

धासेलियां डाक्टर साव छाय् माल हँ,

आया...

कम्पाउण्डर- (तमं) कम्पाउण्डर साहेव दयेक दयेकं

डाक्टर साहेव छाय्माला छंता ? मंत्रीतय्-

थाय् वा वांहे लिमलाः बलय् छथें न्यापिता

स्वया चवनेलाःला डाक्टर साहेवया ? छथें

न्यापिता स्वयेम्हा जि कम्पाउण्डर साहेव

द हे दःनि ।

मेम्ह विराम- ए... छि कपंदर सावला ! नमस्ते साव !

आया...

कम्पाउण्डर- (छाः पहलं) नमस्ते, नमस्ते । छु जुला

छंता ? छु स्याता ?

मेम्ह विरामी- फुकं स्याता अया अया...

कम्पाउण्डर- (अजुगति चायाः) फुकं स्याता ! थुगु

स्याता, उगु स्याता धायेगु मरुका मखुला ?

मेम्ह विरामी- अँ अथे मरु फुकं हे स्याःगु !

कम्पाउण्डर- सय् सय् थुलेवा, छक स्वयेवा, गथे फुकं

स्याःगु !

मेम्ह विरामी- (म्ह ज्याज्यां) आया... फुकं हे स्याःगु

आया ।

कम्पाउण्डर - म्हय् थिये हे मलाःनि आया... आया...

धकाः हाले धुकल ।

मेम्ह विरामी- म्हाय् मथ्यूगुलियां खः इन स्याःगु

आया... आया...

कम्पाउण्डर- सय् सय् थुलेवा । म्हुतु आं या !

(मेम्ह विरामीं म्हुतु वां खाइ । कम्पाउण्डरं

टर्चलाईटं म्हुतु दुने स्वे । टेटीसकोपं छाती

जाँचय् याइ ! मेम्ह विरामी धाःसा आया

आयातुं हाला चवनी)

कम्पाउण्डर- का स्वाःल छ आया... आया... हालेस्वाःल

छंगु त्वय् थव धकाः जि सीकेधुन (टेबुलय्

चवंगु सिसिकाकां) ना, थव वास भच्चा त्वँ,

थुकि छंगु फुकं स्याःगु तानो ।

मेम्ह विरामी- आया... ...

(कम्पाउण्डरं वास त्वंकी, तर मेम्ह विरामीं
पिच्च यांना: वास ल्हें)

कम्पाउण्डर- (तमं जागय् जुया:) अय् छु यानागु छं ?
छाय् वास ल्हैयागु ?

मेम्ह विरामी- वास मसा: चाकुसे मच्चं, मय् । आया ... ।

कम्पाउण्डर- वास धयागु साइलालय् ?

मेम्ह विरामी- मसा:गु वास काथुं ववाहां वानिलालय् ?
आया ... (आया आया धाधां मेम्ह विरामी
तिसिंहि बैय् पयतुइ)

कम्पाउण्डर- अय्, आया आया धाधां थन पयतुनागु ?
कायेकि कायेकि मथां ।

मेम्ह विरामी- गना झायेकेगु जि आया...

कम्पाउण्डर- (तमं) गनानं कायाकागु छ: आनाहे
ल्याहां कायेकेगुका ।

मेम्ह विरामी- जियां ल्याहां वानेम्हा मखुत । थानाहे
भर्ना जुये धका: वया, गना ल्याहां वना
चवनेगु आया...

कम्पाउण्डर- थाना सिटहे मरु, गना भर्ना जुयेगु छ ?

मेम्ह विरामी- सिट मरुसा बाय् जूसां भर्ना जुयेगु आया:

कम्पाउण्डर- सिटय् भर्ना याये मा:थाय् बाय् भर्ना यानां
जीगुला छंत । हुं हुं, सिट मरु धासेलि ।

(कम्पाउण्डरं ल्हा: ज्वना: थनेत सनी)

मेम्ह विरामी- (धेताहा जुया:) जियां थाना नं पेलांगुत्या
हे चिलेम्हा मखुत । जियां बाय् जूसां भर्ना
जुयेगु । जिता भर्ना याना दिसं आया...

(कम्पाउण्डर हीमी चाया: मज्यू मज्यू

धाधां मेम्ह विरामीयात लुइ, तर लुयायंके
फेमजु, अले छुयाये छुयाये जुया: पाले स:ती)

कम्पाउण्डर- आय् हर्खं वाहादुर !

मेम्ह विरामी- छाय् हजूर ! आया...

कम्पाउण्डर (तमं) छंता स:तागु मखु, जिमि पालेयाता
स:तागु ।

मेम्ह विरामी- जिगु नां नं हर्खं वाहादुर जूगुलि जिता
स:तगुला धका: हजूर धायागु । आया...

कम्पाउण्डर- (हीमी चावां) थव पाल्यात नं गना स्यू
वानार्थे । स:तेबलय् दै हे मखु । का छ हुं,
छंता थाना तये मखु जि । डाक्टरं खांसा
स्याइ जिमित । आय् हर्खं वाहादुरचा !

(कम्पाउण्डर पाले स:तुतुं प्याहां वनी अले
मेम्ह विरामीया खाताय् चवनाच्चंम्ह
विरामी नापं खवा: ल्वाइ आया... आया...
धाधां तीजक दना: खाता थोक वनी)

मेम्ह विरामी- आया... आया... जि छम्हा नं छिगु
खाताय् भर्ना जुये जीला ? आया...

विरामी- ज्यू, दिसं ।

मेम्ह विरामी- (खाताय् तीजक पयतुतुं) भर्ना जुयेता नं
सावहे थाकु का थव अस्पताल धा:थाय् ।
बैय् भर्ना जुये धयां हे भर्ना यायेगु खां
मल्हा:का आया... आया... स्यात...

विरामी- साव हे स्या: खवा:का छिताला ! छु
स्याता अपासकं ?

मेम्ह विरामी- ओ, सावहे स्याता । आया...

विरामी- मखु धार्थे खयेक स्या:गु गना गना ?

मेम्ह विरामी- धार्थे खयेक स्या:गुतुं गनाहे मरु (चाक
माक स्वया:) सुयातां धाया दियेमते जिता
स्यागु छुं नं मखु ।

विरामी- (अजुगति चाया:) स्या:गु छुं नं मखु !

मेम्ह विरामी- ख:या स्या:गु छुं नं मखु । छिता मखयेक
धाये मा:गु छु द: ।

विरामी- छुं नं मस्या:गु जूसा छाय्लय् आया...

आया... धया वयागु ।

मेम्ह विरामी- आया... आया हालगुयां तोहका तोह
अस्पतालय् भर्ना जुयेता । आया... आया...

हाला वयां हे भर्ना मया: आया आया

हाला मव:सा अस्पतालय् दुस्वकि ला ?

विरामी- छुं हे मस्या:म्हा छाय् अस्पतालय् भर्ना
जूवयागु लय् ?

मेम्ह विरामी- भर्ना जू मवसें हे मगात छुयायेलय् । (थ:गु

न्यता: थमंतु थिया:) जिगु खवा: छक: स्वसा

नया खवा: व:ला जि ? नये मखंसेलि छु

यायेगु ? ज्या मरु, कला: दु । परिवार

नियोजनं सरा: मव्यूपि ग्वाल ग्वाल संतान

दु । कलाचां लप्ते सुया: ववा: ना: त्वंका

मत:गु जूसा संतानतय्गु खुला दाकीला

नापां सिधलका ! संतानया दाकिला सिध:

धा:सा जिगु छु सिध: जुइ छि हे छक:

विचार गाड दिसं । उकें जि थाना मवसें

गना वने ? थन जूसा न्हि निछाक जा नया: नं

इलय् ब्यलय् अनार, मोसम, खेय्, दुरु, ला

इत्यादि नये दै । उखुनु तिनि जिमिथाय्

त्वालय् च्वंम्ह धिजमां साहुया काय् नरमांचा

अस्पतालय् च्वना वला ! व न्हापा रोगी

गांसी साव हे । निला अस्पतालय् च्वना

व:बलय् ला कुतु वा थें ल्ह्वं व:गु । जि

वयाके न्यना- 'खला गय् अपासकं रोगीम्हा,

गांसीम्हा गथे ल्ह्वन ?' वं धाला- 'थ्व फुकं

अस्पतालया प्रतापं ! मसितु जाकिया जा,

ला, खेय्, धय:, दुरु, अनार, मोसम, केरा,

सुन्तला गवलें खालि मजू, अले मल्ह-

निला ! ध्यवा पुले मा:गु मछु न्हाक्व न

फ्री । छ नं ल्ह्वं के य:सा अस्पतालय् हूं ।'

वयागु हे खां न्यना: जि नं अस्पतालय् भर्ना

जुये धका: वयागु । अस्पतालय् अथें वयां

भर्ना मया:गु सिया: हे आया... आया...

हाला वयागु । छिता हेयेक: धायेमा:गु छु

द: ।

विरामी- (छयो ल्हुकु ल्हुकु यायां) ए... खां थुल
थुल ।

(अवलय् हे अस्पतालयाम्ह भा:सा ब्रम्ह जा

भु च्वना वै, विरामीया न्ह्य:ने तथा बी,

विरामीं जा नं)

मेम्ह विरामी (ककुइ ई थत ववत छवया:) आनु छु ?

विरामी- (ननं, जा, अस्पतालया जा !

मेम्ह विरामी- (लय्ताया:) ए... अस्पतालया जा क

अय्सा । अले जिता ग्वलय् ?

ब्रम्ह- छ सु ? विरामी ला ?

मेम्ह विरामी- अं जि नं विरामी, ग्व जिता जा ?

ब्रम्ह- छ नं विरामी ! छ गबलय् भर्ना जुयाम्ह ?

मेम्ह विरामी- आ: नकतिति जक भर्ना जुयाम्हा जि

(विरामीयात थवका:) खला जि नकतिति

जक भर्ना जुयाम्हा (व:जुयात थवका:)

पत्या: मजूसा बय्क:याके न्यना स्व । दय्कं

भर्ना जुयागु फुकं खां ।

ब्रम्ह- (विरामीयाके) ख:ला व भर्ना जूगु

ख:ला ? (विरामीं जाननं छयो ल्हुकु

ल्हुकु याइ)

ब्रम्ह- ख:सा जि जा हया बी, आसे !

(ब्रम्ह वनी, मेम्ह विरामीं, विरामीया जा

भु स्वस्वं म्हुतुइ ई बुइका:, रुद्रघण्टी थस्व

वस्व याइ, विरामीं थ:गु जा भु मेम्ह

विरामीयात मक्यने थें सुचुकः जुड, ब्रम्ह
जा भु ज्वनाः वड, मेम्ह विरामीयात बी)

मेम्ह विरामी- (जाभु स्वस्व) बाजे, थ्व ला जा ?

ब्रम्ह- आमु जा मखुसा मेगु छु लय ?

मेम्ह विरामी- थ्व जा मखु धकाः मधया जि नं !

ब्रम्ह- अले छु धयाम्हालय छ ?

मेम्ह विरामी- जा मगाः धयाम्हा क जि, थुलिचा जा
गाइगुला ?

ब्रम्ह- अम्हाय विरामीतसे आपाः आपाः नये
ब्युला व, आमुलि हे खः विरामीतय्ता ।

मेम्ह विरामी- मखु, थ्वयां गाहे मगाः, नेसंचा तना ति !

म्ह- आपाः नये मज्यूया विरामीतय्सं !

मेम्ह विरामी- आपाः नयेगु, (म्होचा नयेगु विरामीत
स्वयाः नं वनीनि बाजे । जि मचा आपाः
नयेमाःम्ह विरामी जुलका । थुलिचा जक
आ नल धाःसाला जि फन हे सने मफयेक
विरामी जुड ।

ब्रम्ह- का म्वाःल ताहाक राग कया चवने
म्वाःल । आमुलि अप्वः जा छगःहे वड
मखु, यःसा न मयःसा नये म्वाः. ॐ जियां
वनका ।

मेम्ह विरामी- का बाजे, कच कच याये मते, पुं क नेसंचा
जा तनाति !

ब्रम्ह- अहो काय् छयां चर्कोम्हा विरामी खः ।
छं छु जिके कायेमाःगु दुला आम्बे, कच
कच यायेमते धायेता । हाँड ?

मेम्ह विरामी- गाहे मगाःगु धयां ठुयाये बाजे ! गाक्क
तया ब्यूगुसां यां हाले मालिगु हे मखुनि ।
थुलिचा मथे नयेगु, काथुं खनं ववाहां
वानिला ! बह थ्वनं लिता यंकि बाजे, नयागु

सुख मदयेक छु नया चवनेगु ।

ब्रम्ह- अहो छंयां थःम्हा मिसायाता स्वयाः नं
घुकि वयन नि ।

मेम्ह विरामी- (खं ल्हाये हे संमडु पहलं) छु हालेगु खाँ
मथुपुं नपां, उँ ।

ब्रम्ह- आः छं छु आपाः नयेहे माला क मखुला ?

मेम्ह विरामी- आपाः माला धकाः हाला चवनाः तिनि,
आपाः मालाक मखुला हँ ? खाँ हे स्व, छु
खाँ धायेगु । जियां लाता हे जुडगु ।

ब्रम्ह- (उखे थुखे चाकमाक स्वयाः ससंकिता
जुजुं) छं आपाः नहे नयेगुका मखुला ?

मेम्ह विरामी- नयेगु धयां ग्वःकः धायेमाला बाजेयाता नं ।

ब्रम्ह- का, आपाः नहे नयेगु जूसा छम्हो पाय्म्हो
लिका !

मेम्ह विरामी- ध्यवायां मरु जिके । ध्यवा ज्वना मवया ।

ब्रम्ह- अस्पतालय् वानेता ध्यवा घाना वायेमाः
धकाः मस्यूला छं ? ध्यवा मरुसा जा नं
मरु ! आमुलि गाकेगु जूसा गाकि मखुसा
मरु ।

मेम्ह विरामी- (मचा वालल चवनाःलि) अथेसा कम्हय्
कसा बीका !

ब्रम्ह- अहो आमजाःगु खाँ मज्यू, थाना उधारो
बन्द भाइ ।

मेम्ह विरामी- पसलय् पसलय्थां उधारो कायेज्यू, थाना
अस्पतालय् जक मज्यूला व !

ब्रम्ह- पसलय् ज्यूसां थाना नि मज्यूका, हाले हे
म्वाः ।

मेम्ह विरामी- पचय् थाना वानिला बाजेया छम्होचा दां !
अस्पतालं प्याहां वाने खुनु हे बिया थके,
छाय् धंधा (विरामीयात वयनाः) वय्कः-

याके भना स्व बिया थकीला मथकीला थें ।
अथे वेदमान याना नयेयां कात्या नयेक
वर ।

ब्रम्ह- (विरामीयाके) खइला, थवं बिया थकीला
छम्हो दां !

मेम्ह विरामी- (विरामीयाके) धया दिसका, बिया थकी
धकाः ।

विरामी- खः, बिया थकी !

ब्रम्ह- का अथेसा छ जिम्मा जुल । वं बिया
मवान कि जियां छंके ज्वनेम्हा ।

मेम्ह विरामी- (विरामीयाके) ज्यू, जि पुले धया दिसैं ।

विरामी- ज्यू जि पुले ।

मेम्ह विरामी- का जिल मखुला बाजे आःयां ।

ब्रम्ह- का छं पुलेगु जूसा जि जा कया ह्येका ।
(ब्रम्ह वनी, जा कया हइ, जा तथा बी)

मेम्ह विरामी- हः बस् बस् (जा स्वस्वं) अऊ भचा गाइ
छवाः मवःनि । अथेसां म्बाःलका । आः,
ला मानिका बाजे (विरामीया भुइ क्यनाः)
वय्कः पातार्थे ।

ब्रम्ह- ला नये धकायां छं सुरुं हे पुयेम्बाः । छथें
न्याःपिसं नये फइगु ला ला ?

मेम्ह विरामी- छाय् सुरुं पुयेम्बाः ? जिथें न्याःपिसं छु
खाय् ला नये मफइगु ?

ब्रम्ह- ला नयेता वय्कः थें मंत्रीयाम्हा मनू जुये
मानिक सिलल ?

मेम्ह विरामी- ए... अय्सायां ला नये खानि मखुत ।

ब्रम्ह- न्हाच हे धाये धुननि ला नये धकाः सुरुं हे
पुयेम्बाः धकाः । का, जियां वानक, छम्हो
दां लुमनि खाला !

मेम्ह विरामी- लुमनि मखु दे दे ।

(ब्रम्ह वने धकाः वनी मेम्ह विरामीं नं जा
नइ, वं थःगु भुइ छकः स्वइ विरामीया भुइ
छकः स्वइ । वं स्वःलिसे विरामीं भु म्हं
किकी) थव पहः ब्रम्ह थः मवसें ल्यूने
ज्वनाः स्वधार्नि ज्वनी (निम्हेसिके ल्यूने
ज्वम्ह ब्रम्ह याद बइमखु ।)

मेम्ह विरामी- (जा ननं) अय्सा छि मंत्रीयाम्हा मनूका
(विरामीं जा ननं छथों ल्हुकु ल्हुकु याइ)
अथे खःसायां छि नापालाःगु छो हे नापलाःगु
ति ग्यन जितः । जागीर छगू नये दःसा ज्यू
धकाः जुयागु आः नं मखुत । मंत्रीया मनू
नापमलाःगुलि थों तक जागीर नये
मफयानि जि । अहो छि मंत्रीयाम्हा मनू
खनी । गजाःगु भाग्य जिगु उकि, छि
मंत्रीया सुयें ? जिचा भाजुला ? (विरामीं
मखु धइगु छथों संकी) भिचाला,
काय्चाला ? (विरामीं मखु धइगु छथों
संकी) ए... अय्सा मंत्रीया जिचा भाजुया
नं जिचा भाजुला खः ? (मखु धइगु छथों
संकी) मंत्रीया पासाला लय् ? (मखु धइगु
छथों संकी) अय्सा मंत्रीया सु परेजू लय्
छि ? छि मंत्रीया पो. ए. या बाजुया
ससःकिजा ? (मखु धइगु छथों संकी) व
नं मखु थव नं मखुसा मंत्रीया छि सुलय ।
विरामी- जि मंत्रीया न्हाम्हासां खःका । मंत्रीयात
जि म्हासिया ।

मेम्ह विरामी- ए... छि मंत्री म्हासिया क अय्सा !

विरामी- म्हासिया ।

मेम्ह विरामी- बांलाक हे म्हासियाला छि ?

विरामी- बांलाक हे म्हासिया जि मंत्रीयाता, तर

मंत्री जिता म्हामस्यूका ।

मेम्ह विरामी— ए छि जक मंत्रीयाता म्हासिल मंत्री म्हा-
मस्यूका छितः ।

विरामी— ज्यउ वं जिता म्हामस्यू । जि मंत्रीयाता
जम्मा निकः खनागु दः । छकः भाषण
बूबलय्, छकः कण्डावाल मोटरय् चवनाः
हररर रत्नपार्क चाहू वःबलय् ।

मेम्ह विरामी— अथे धायेबलय् छि अपासक मंत्रीयाम्ह मन्
मखुतला कि छु ?

विरामी— ज्यउ अपासक मंत्रीयाम्ह मन् धाये मज्यू
जितः । जियां मंत्रीयाम्ह मन् मखुसां खयेका
जक चवनाम्ह छिगु हिं हिं हिं हिं ।

मेम्ह विरामी— (जिल्ल जुयाः) मंत्रीयाम्ह मन् मखुसां
खयेका चवनाम्ह धायेबलय् छु जुल, जियां
खां थुइके मफुत ।

विरामी— खां गथे जुला धाःसा, मखुगु खां छाये
ल्हायेगु छिता । जवर वयाः थाना अस्पता-
लय् वयाक जि । छिताथे हे जिता नं सिट
मरु धयाः भर्ना मयाः । छुयाये छुयाये जुल
जिता । जियां सरासर टेलिफोन भफिसय्
वनाः छसुका धयवा कुकाः श्वहे अस्पतालवा
फोन नम्बरय् वण्टी याना । फोन डाक्टरं
हे ल्हन, ल्हना कथं हे 'यस, डाक्टर
स्पकिङ्ग' धाल । अले जि धया— 'म
मंत्रीज्यू बोलेको ।' उलि धायेवं डाक्टरं
ल्हाः निपां वव्व स्यानाः ग्याः भासं धाल—
'नमस्कार हजूर' ।

मेम्ह विरामी— डाक्टरं ल्हाः वव्व स्याःगु नं टेलिफोनं
खने दःला ?

विरामी— ल्हाः वव्व स्याःगुतुं खने मरु तर ताये

दःनि टेलिफोनं ।

मेम्ह विरामी— वतुं खः, अले ?

विरामी— अले जि धया— 'एक जना माकल टोपी
लाएको माछे त्याहां अस्पतालमा आएको
छ, वहाँलाई भर्ना लीदिनुस्, अलि राम्रो
हेर विचार पनि गरी दिनुस् । त्यो मेरो
आफ्नै माछे हो ।' उलि धयाबलय्
डाक्टरं— 'हवस हजूर हवस, अहिले तुरुन्तै
भर्ना गर्नु' धकाः धाल अनं जि अस्पतालय्
वया, जितः खनेसाथ डाक्टर हथापथासं
वयाः 'आउनुस् आउनुस्' धायां छुं छां
गनं हे जांच मयासें भर्ना यानाबिल । उसां
निसे हे जि थानाया थानांतुं तनि । स्वला
दत जि थाना वयागु, आ तकं जितः प्याहां
हुं धाये मछाःनि ।

मेम्ह विरामी— ए... अथेला अम्हायसा ! जियां धाथे
खयेक हे मंत्रीया मन् धकाः गुलि लय्ताये
धुंगु ! जागीर छगू नये धयां हे... ..

विरामी— जागीर नयेता अंग्रेजी भाय् सःसां गाः ।
छि अंग्रेजी भाय् सयाला !

मेम्ह विरामी— अंग्रेजी भाय्मां मसया जि ।

विरामी— अंग्रेजी भाय् मसः सायां छि गथे जागीर
नइ !

मेम्ह विरामी— अंग्रेजी भाय् मसःसां चाइनीज भाय् सया
नि जि !

विरामी— गनानं सयेका छि चाइनीज भाय् ? जियां
पत्याः मजुया । चाइनीज भाय् स्थनीगु
इस्कूल हे यां मरु कीथाय् ।

मेम्ह विरामी— कोदारी, चक्रपथ, ट्रलिबस दयेकः वःबलय्
चाइनीजत नापां पासा जुलाक जि ! उकिं

ચાઇનો ભાઈ સાગુ જિ । સ્વ પત્યા: મજૂસા
જિ લ્હાના ક્યને (ચાઇનિજ ભાઈ લ્હાઈ)

વિરામી- આમુ ચાઇનોજ ભાઈ ન્હાવેવ હે લ્હાયે સ:સાં
જાગીર નયે ફડ મહુ । જાગીર નયેતાયાં
અંગ્રેજી ભાઈ હે મા: । સ્વ, ચાઇનોજતયુ
જ્યા જકં જ્યા લગ્ય જુલા, માઈ જ્યા લગ્ય
મજૂ । અંગ્રેજતયુ જ્યા જ્યાલગ્ય મજૂ તર
ભાઈ જ્યા લગ્ય જૂ ।

(હું ફુક ન્યનાચ્વંમ્હ બ્રમ્હ છર્ચો લ્હકુ લ્હકુ
યાયાં વનો)

મેમ્હ વિરામી- (જા મુ બૈય તયા:) જાગીર નયે મહંસાંહે
વલકા, કા વહે વલ । છુ યાયેગુ આ: !

વિરામી- છુ વલ ?

મેમ્હ વિરામી- ર્યે વલ । જા ત્યક નયે ધાંહુનુ જિકે
ગયે ગયે મ્યે હાલે વડગુ । કા જિ હે મજિલ
વ હે વલ-

સ્વ:લિસે સ્વય્ મય: પાઉડર બુડમ્હ મયજુ

ગુલિ બાંલા: છંગુ ન્હાઈ ન્હિ સુતુ સુતુ વ:

જિલા છંતા મયયેકા ચવને ન્હાવલે ન્હાવલે લ્હય્કા ચવનિડ

લ્હયા લ્હા:ગુ છંગુ લ્હા: છાઈ જક સ્વયા ચવને

વિરામી- વલ વલ જિકે નં વલ । જિ નં અજ્યા:મ્હા

મેપિસં મ્યે હાલકિ મહાસં ચવને મફુમ્હા ।

મરુ મરુ મરુ ગણેદોયા મજુ ગરુ

મેમ્હ વિરામી- મજુ ગરુ ધાયાગુ છુ ?

વિરામી- મજુ ગરુ ધાયાગુ ગજૂ મરુ ધાયાગુ કા ।

મરુ મરુ મરુ ગણેદોયા મજુ ગરુ

જિ હમ્હેસિયા, આ: છુ મરુ ધાયે સ્વ,

ન્હાગુસા મરુકા ।

મરુ મરુ ગુરુજીપિનિ આંગસા મરુ

લ્હવપ્ તય્ લેકવપ્ વા નં દહે મરુ ।

મેમ્હ વિરામી- આ: જિ છુ યાયેગુ આ: જિ છુ યાયેગુ,

વિરામી- લૈલા... મજનુ... ..

મેમ્હ વિરામી- તિનિહ્ય: દશ્વો પિકનિક વનાં લપ્તે ફસં
પુડકલ, ત્પાવસો મચાં લિ કા:ગુ માંમ્હેસિતે
હુડકલ ।

વિરામી- હે પૂરવ કાલી, હે પશ્ચિમ કાલી, હે ઉત્તર
કાલી, હે દક્ષિણકાલી છ:પિં જક કાલી
મહુ, મિસ્ત દશ્વં કાલી છ: છાઈ:ધાસા
અપિ ફુવકં હે (અવલય્ હે બ્રમ્હ વ કમ્પા-
ઉણ્ડર તોજક વડ તર નિમ્હં વિરામી
વા:ચાઈ મહુ અપિ નિમ્હં મ્યેયા કમ્પોટીસ-
નય્ વના ચવનો)

મેમ્હ વિરામી- લૈલા લૈલામા લૈલા માલા ક્ય:

અલતે વલતે સલામ છુ

વિરામી- સિયાઈ યાચે યાના ડ્યાયા, માઈમિરી
મિરી મિરી (મેમ્હ વિરામી બ્રમ્હ વ
કમ્પાઉણ્ડરયાત લ્હનો, વિરામીયા છર્ચો
જવના: કમ્પાઉણ્ડરપિ પાલે સ્વકી નિહ્સયાં
લ્હનો । વિરામી વાલ્લ ચવનો મેમ્હ, વિરામી
આયા ... આયા ... હાલા હાઈ)

કમ્પાઉણ્ડર- (તમં) આયા ... આયા ... મહુલા આયા ...

બ્રમ્હ- નિહ્સ ઠગ કમ્પાઉણ્ડર સાહેવ । થુમ્હ
મંત્રીયા મનૂ જુયા: અસ્પતાલયા લા વ જા
નયાચ્વંમ્હા, થુમ્હ અસ્પતાલયા જા નયેતા

વિરામી છુના: વ:હ્યા !

મેમ્હ વિરામી- આયા

કમ્પાઉણ્ડર- અઠ આયા તિનિક મહુલા !

મેમ્હ વિરામી- લ: આયા

કમ્પાઉણ્ડર- ક પુલિસ સ:તિ, થર્થે થુમિત જ્વંકા છવયેગુ
કાનુ પુલિસ સ:ત:વનેનુ ।

(कम्पाउण्डर व बम्हू निह्ना वनी)

विरामी- का छु पायेगु आः, मखुथे जुल ! पुलिस
अहो ! का त्वपु जितः । न्ह्यागुलिसां त्वपु,
आमु गिलासं जूसां त्वपु ।

मेहा विरामी- गिलासं त्वपुयां नं त्वपुया जुइला खाने हे
दइनि । छाये ग्यायेगु ज्वंका वनेका ।

विरामी- गुरुजुबाता सिक्क दाःथे पुलिसं दायेकेता-
ला ! मय् मय् पुलिसं छता ज्वंका वाने
मज्यू ।

मेम्ह विरामी- छाये दाइ ? न्ह्यागु न्यंसां खः धायेवंला
दाइ हे मखुनि ! सरकारयात ब्वःबिया
खःला घकाः न्यंसा 'खः' धाये । स्व, जेलय्
यंकूसां घन्धा कायेम्बाः । थाना अस्पतालय्
स्वयाः नं आना ज्यू, आना छाकं स्वच्कं
जाकि बीगु दः सिल ला । कानु ज्वंका
वाने नु । जेलय् नेतात नं नापलाइ सिलला
छं बह ज्वंका जति वनेमासिनि सिति मिति

वने मज्यूका । कीथे न्यापुं गरीबापिता नं
ज्या लगय् जुइगु, कीता नं जेलय् 'क'
ब्लासवा खाना दइगु काथं वानेमाः
सिलला !

विरामी- सिल सिल, इन्कलाव, थथे मखु ?

मेहा विरामी- खः खः जिन्दावाद ।

विरामी- नयेगु, त्वनेगु, पुनेगु ब्यु !

मेम्ह विरामी- मखुसा फुकं त्वःता ब्यु ।

◆ धर्कि ◆

(श्व ख्यालः खवप, खंपु, पोखरा व येय् ख्यालः पुचः
खवपपाखें वयने धुंगु जुल । थुकी म्हिता दिईपि पासापि
थुकथं न्हांय् !

कम्पाउण्डर-

सथलाल मूल

बम्हू-

कर्ण बहादुर हाःजु व विष्णु भक्त मूल

मेम्ह विरामी-

कृष्ण नापित

विरामी-

रामशेखर)



बिदेहं ह्ये माःसु मच्चिकं च्याके स्वयाः थःथाय् हे दुःसु
सि दुइसु बांलाः

सर्विक

अगः उइत, सालय् तू सिइत न्हि न्हि जा थुइत व मेमेगु भुतूज्यायात माःसा
गंगु भिगु सिं दंगु भावं काः झासं ।

चिरिभाइ दाइया सँपसः

बसन्तपुर, येँ ।

अस्वायी स्तम्भ : सफू म्हसीके

लॅपु

समालोचक : सानुराजा वज्र आचार्य

बी. ए. (डी. ए.), एन. डी. एस.

(खवा:पालं पुइपि च्वमिपिनि खवालय हाकलं ईके मा:गु खं वा: चा:गुलिं थ्व 'सफू ह्मासीके' च्वया च्वना ।)

'मां-माय् मां-माय्' धका: नारा जक बिया: सक-सितं ववायेफुपिनिगु लुखां च्वं स्याना: पितंगु सफू 'लॅपु' ख: । न्हू दैय् पितंगु सफू पुलां जुइ धुंका: नं वजारय् न्याये मदुगु थ्व सफू, सफूया च्वमि व पिकाकया भाषा-साहित्यप्रति अगाध श्रद्धा, भक्ति व माया ममताया दनु ख: । प्रा. माणिकलाल श्रेष्ठया छेँय् ग्व:फय् हयेत तंह्य, १ समालोचक मंगलप्रसादया महलय् ग्व:फय् हयाब्यूह, २ कवि दुर्गालाल, कविवर सिद्धिचरण श्रेष्ठ, साहित्यकार प्रेमबहादुर कसा:, ३ प्रा. पुष्प चित्रकार ४ व मेमेपि छह निम्हेस्यां सँहलं थना बिया: तिनि नेपाल भाषा साहित्य क्षेत्रय् छेँ छखा दंह्य भाजु भूषणप्रसाद श्रेष्ठया स्वंगुगु चिबाखं सफू ख: थ्व 'लॅपु' । डा. कमलप्रकाश मल्लं थ्व सफुती च्वयात:गु भूमिकाय् दुर्लभलालसिया 'किंकिपा' चिबाखं सफूया मयासँ मगा:गु उल्लेख नं ववाप्य प्यारो नये थें नयाव्यूगुलिं भूमिका चावकुसे च्वं ।

भेनिस्ता पाता छबलय् छापय् याना: आधुनिक बित्रया जस कायेतसंगु थ्व सफूया छबलय्हे च्वयात:गु 'लॅपु' कुडाक्षर नं नेपाल जावाया छगू लिपि खया कयात:गु ख: । च्वमि थ:गु सफूया छबलय् आशाराम शाक्यं ला: ला: थें याना: बांमलाक सम्पादन यानात:गु 'सिरपा:' बाखं सफू दुध्याकेगु दुध्यास या:गु दलिं थ्यूवेचंगु छबलं

यचुक वयं ।

सफूया मू स्वम्ब: जक ख:सां सफूया हामा पिकाक जूगुलिं च्वमि पिकाकयात शिष्ट: दामं सफू म्यूगु खें तप्यं-कहे सी दु । पिकाकं ग्यानाका:गुली दकलय् ह्मापांगु जक मखु, दकलय् थिकेक दकलय् सकलय् ह्मापां पिकाकयात म्यूगु सफू नं थ्वहे ख: । थ्व खंया लिधंसा कया: कीसं बाखंमि भूषणप्रसादयात सफलह्य बाखंमि जक मखु व्यापारी नं ख: धका: अदालतय् थने यंके फु ।

५२ पौ दुगु थ्व सफुती थाय् थासय् च्वमिहे ग्यंके धुंकूगु अन्ने विभिन्न पत्रिकाय् पिदने धुंकूगु न पु चिबाखं नापं (छति मछ्या: मजुसँ थ:गु बाखं थम्हंहे खुया:) २० पु बाखं दुध्याकात:गु दु ।

थ: य:म्ह बिधवा मिसा नापलायेगु गल्लिया लँचा लुमंका: सफूया नां 'लॅपु' तयात:गु तसकं त्व: । बाखंमि सी धुंका: स्वर्गया लुखा तित्नाबीम्ह, मतिनाया लॅपुइ प:खा: जुया: दंवइम्ह, मथ्या:म्ह कला:पाखें दुम्ह काय्या नामय् थ्व सफू छछायात:गु च्वमिया मूर्खता ख: ।

'बिका: पाखें' न्हू च्वमिपिनि हिच:ति हायेका: च्वया-त:गु सफू दुत कायेगु जक मखु सिधा सोझापि च्वमिपिनिगु धुकू नं स:बाय् दुतकायेगु जा: पयनाच्वंगु दु, उकिं न्हू च्वमिपि व च्वमिपि कंग:तय्गु पंजलं मुक्त जुइत पला: पति: स्वां पुया: जुइमा:गु दु ।

सफूया छब: पुइकेवंहे खवा:पालं पुइपि, च्वमि स्वया:

खेंपु छ्यानाः जनतायात ध्वं लाईपि न्याम्ह साहित्यिक भाजुपिसं बाखंमियात अःखतं सिमा गयेकाः पतनया लेंय् यंकाच्वंगु खें छापय् यानातःगु दु । थ्व च्वसुया च्वमि जि समालोचक भाजुं व्यक्तिगत तवरं स्यूकथं थुजाःगु खें सफुती छापय् याकेगुली सफूया पिकाक व अःखतं सिमा गयेकाव्यूपि साहित्यिक भाजुपित्त पुलां पुलापि बाखंमितसें लप्ते फसं पूथाय् यंकाः छ्वासय् द्यगुपूजा न्यायेके व्युगु दु । थुज्वःगु खेंया नापनापं सफू न्यूज प्रिन्टय् पिहांवःगु खनेवं बाखंमिया दकलय् यापि शत्रुतसें कवाफय् लाला कायेगु जक मखु ह्याकुलाय् नं टोप तयेकूगु दु ।

आः छपु छपु यानाः दइवं बाखंया मूखें व मू छत्वाः छत्वाः जक च्वये । :-

१. शान्ति सन्देश : बुद्धया नामय् कलंक तयाः, देशय् अशान्ति हयेमाःगु मू खें दुगु थ्व बाखंया मू संयुक्त राष्ट्र संघया बडा पत्रया लिधंसा खः ।
२. मूर्त-अमूर्त : दे थुवाःत सकलें मूर्त रूपय् नपुसक अले अमूर्त रूपय् घुस्याः जुइमाःगु सन्देश थुकी रकेटया सः थें थ्वयाच्वंगु दु ।
३. कथी दियातःगु ध्वांय् : मन्त्री धाववस्यां कथी ध्वांय् तीगु पलिसा ध्वांय्या लं सुयाः फीगु यातकि आधुनिक फेशनया खलय् नेपाःया नां च्वनीगु खेंयात थ्व बाखनय् अनुसन्धान यानाः क्यनातःगु दु ।
४. जीवन-मृत्यु : 'मनु' मै छ स्वर्ग हेर, जिउनु कीति खालि' धेंगु स्व. लक्ष्मीप्रसाद देवकोटाया कविता लिधंसा कथाः थ्व बाखनं वहादुर धाःपि सकसित आत्महत्या यायेगु इनाप यानाच्वंगु दु ।
५. वा वल, निभाः त्वल, धुंया मचा बुल : अन्न सइगु बुई मनु सइगु छें दनेत याकनहे धूसखोरी आन्दोलन शुरू यायेमाःगु खें थ्व बाखनय् कलात्मक अले प्रति-कात्मक तवरं व्यक्त जुयाच्वंगु दु ।

६. छःखः : छः अले छःखः ाव बिदेशय् मियाः स्वीट्जर लाय्ण्डया बैंकय् वां मुकेंगु सल्लाह बिया-च्वंगु थ्व बाखं नैतिक बाखंया इवलय् लाः ।

७. चेतना : विद्यार्थीतय् राजनीति ब्वंकल कि देश कुतुंबनीगु खें अति शुक्ष्म तवरं ब्वयाः स्कूल, क्याम्पस अले विश्व विद्यालयस जक मखु म्हगसय्, तकं राजनीतिया लेंय् वने मफयेक प्रत्येक क्याम्पसय् अले विद्यार्थीया म्हगसय् सिपाहिं पिवाः तयेगु राजनैतिक सल्लाह थ्व बाखनय् अति ह्याइपुवक च्वयातःगु दु ।

८. त्य / पू : ज्वलज्वःपि त्यपू लानाः परिवार नियोजन कार्यक्रम असफल जूगुलि देशय् आः लागू जुयाच्वंगु न्हगु मुलुकी ऐनया विवाह-प्रथायात याकनहे संशोधन यानाः स्वस्थानी बाखनय् थें तु ७० दं दुहा बुल्हानाप ७ दं दुम्ह ल्यासे ब्याहा यायेमाःगु कानूनी व्यवस्था याकनं याकेगु विधेयकया रूपय् थ्व व्यवस्थापन बाखं दु ।

९. विष्णु कका-छगू युग ! छगू चुनौति : लेंय् लेंय् पवनाच्वनीपि पवगितय् ध्यवा पवने बीगु मयासे इमिसं पवनातःगु छुं भचा नं लाका कायेगु वा पवगितय् पवकाः राष्ट्रिय सम्पति व आर्थिक दशकयात चुनौति बियाच्वंम्ह विष्णु ककाया कपा हे थ्व बाखं जूगुलि थुकियात युगया कपा धाःसां ज्यू ।

१०. लय् मडुगु मे—मे मडुगु लय् : रेडियो नेपालया विज्ञापन सेवाय् हायेकीगु लय् मडुगु मेहे नेपाःया राष्ट्रिय मे जूगुलि अले रेडियो पिहांवइगु सः नं मे मडुगु लय् थें च्वंगुलि रेडियो नेपालया फुक्कं सेवायात विज्ञापन सेवा यायेमाःगु खं थ्व बाखनं कीत वाः चायेका बी ।

११. नसंवा : काय्हे बुइकेगु मनोकांक्षा दुपिसं नसंवा इलय् ब्याहा यायेमाःगु अनुसन्धानात्मक लेख थें च्वंगु

श्व बाखं छुं मखयाः नं कयातुस्से चवं ।

१२. स्वार्थान्धः स्वार्थं पूति यायेत अन्ध जुइमाःगु मन्त्र

श्व बाखनं धवाथुइक कनाचवंगु दु ।

१३. पासा : प्रत्येक ल्याय्महतयत् स्वम्ह ल्यासेत पासाया रूपय् व्यवस्था यायेगु कानून मन्त्रीया छत्वाः वक्तव्य जक श्व बाखनय् दुथ्याकातःगु दु ।

१४. अपूर्णता : पद्य कया कयाम्पसय् मिजंतयत् ब्वंकेगु व्यवस्था याये मफुगु न्ह शिक्षा योजनाया अदूरदर्शी अपूर्णताया आगं ब्वलाचवंगु ध्याचुं जाःगु श्व बाखं ल्यासेतसे तसकं ययेकी ।

१५. न्हपुइ प्वाः घाये मफुम्हेसिया स्वानाचवंगु भुतु : न्हपुइ प्वाः घाये मफुपि प्रत्येकसित भुतु जायेक दांप्वः लवस्वाकेगु सरकारया प्रजातान्त्रिक नीतियात प्रचार यानाचवंगु श्व बाखं राजनैतिक कविता खः ।

१६. वर्षाया खुसिचा : वर्षाया खुसिचां नेपाः देयात गावक विजुली उत्पादन यायेगु थें जाःगु भालुं असर्फी खि फाइगु बाखनाप श्व बाखं लनेफु ।

१७. कानूनया गैर कानूनी मचा : कानून धम्ह मनूयात गैर कानूनी धम्ह मचां नालिस तःगुलि फांसी बियाः स्वर्ग छ्वयाव्यूगु श्व छपु न्हकुसं तिति तिति स्वाइगु पुलं बाखं (दन्त्य कथा) खः ।

१८. पाप : हत्या यायेगु पुण्य खः थें नुगलय् स्याकेगु तच्चःगु पाप जूगुलि मयक्वसिगु प्राण कायेमाःगु श्व जासूसी बाखंयात चार्त्स डिकेसया बाखनाप लनाः कोसं बाखंमि भूषणप्रसादयात चान्स भूशेष नामं म्हसीके फु ।

१९. सीगाः : बाखं धंगु सत्य खँहे जुइ धंगु खँयात धवाथु-इकेया लागि तर जूथें चवथेवं साहित्य मजुइगुलि थःगु गांया पलिसा साहुया काय् जक तयाः थःगु कुकृत्य व अनैतिकताया आग छम्ह किच्कन्यायात प्वकेवीका-

तःगु बाखं 'लँपु' सफूया वक्तव्य बांलाःगु बाखं खः ।

श्व बाखनं किच्कन्यायात अमर पाइ ।

२०. लँपुः गल्लिया लंचां धिवा मिसा नापलाः जूबलय्

मिसाया म्हाचं बाखंमिया न्यतालय् चप्पल मुइका-

हःगु अले ह्लिप्यं तिति स्वाका बिस्वु वःबलय् खिगा-

लय् कुतु वंगु घटना लवःमके मफयाः चवथातःगु श्व

बाखनं बाखंमियात एकसरे यानाः वयनाचवंगु दु ।

आधुनिक कविता धंगु छयं छगू लुइकाः मती वथे चवथेगु खः थें आधुनिक समालोचना धंगु न छयं जक स्वयाः मती वथे चवथेगु सिद्धांतयात क्वातुक्क ज्वनाः श्व चवसु चवयाचचनागु खः । 'लँपु' चिबाखं सफूया महत्ववारे स्वाः मदुगु फय्गं खं प्रचार थमजुइमा धइथें जि छिकपित्त समालोचकया नातां अवास्तविक खँ सीकेत सफूहे न्यानाः स्वथेगु इनाप याना । आशा दु, पिमदन्तिवल्य् अत्याधुनि-कंगु श्व सफू ५० दं लिपा याकनहे प्रचारय् वड ।

१. 'वःफय्' बाखं सफुतीचवंगु प्रा. माणिकलाल श्रेष्ठया भूमिका अले 'वातावरण' या ल्याः १० स्वयादिसं ।
२. 'पल्पसा' पत्रिकाय् पिदंगु मंगलप्रसाद श्रेष्ठया समालोचना स्वयादिसं ।
३. 'फिसः' सफुती थय्कःपिनिगु अभिव्यक्ति ब्वनादिसं ।
४. भरत साय्मि मुंगु 'बाखं समालोचना' सफू ब्वनादिसं ।

सापारुनिसैं च्यान्हुतक्क

ल्याय्म्ह मुनाया ग्वसालय्

थाय्मरु त्वाया दबुलिइ जुइगु

न्हापांगु उपत्यका ब्यापी

ख्यालः प्रतियोगीता स्वः ज्ञासैं !

(२ पेजया स्थं)

यात हे लसां लयाः संस्कृत भाय् दयेकूगु खः । खबलया
खुश्वः बिहानतसें यःत साधारण जनता स्वयाः इतं
चवय्यापि धइगु ब्यनेत नेपाल भाषाया यक्व खँवःयात
हीकाः भचा भचा बांलाकाः नुवायेगु व चवयेगु याःगु खः ।
थुकिया छुं बसि बवय् वियागु दु-

१. बिप्लबी - थ्व खँवः नेपाल भाषां तप्यंक
संस्कृतय् वंगु खः । नेपाल भाषाया 'बि पाला बी' व
संस्कृतया 'बिप्लबी' खँवःया अर्थ वहे तुं खः । बि पाला बी
धायेलय् ज्यापु ज्यामितसें ग्यानापुक्क धाइगु तप्यंगु भाय्
जुल, बिप्लबी धायेलय् भचा सुसंस्कृत जुयाः धायेगु जुल ।
याःगु छुं नं मखु ।

२ जल- नेपाल भाषाय् लः स्वताजियागु दु- जल,
लख ६ व नाख । जल धयागु शुद्धगु व पवित्रगु लः, लख
(लः) धइगु साधारण लः व नाख (नाः) धइगु फोहरगु लः
खः । उकिं थःत सुसंस्कृत धाइपिसं जनतां त्वनीगु साधारण
लः मत्वंसे जल जक त्वनेगु यात व लिपा जुजुं जल त्वने
माःसां, लः त्वने माःसां नाः त्वने माःसां जल त्वनेगु हे
जक धया छवत । थुकथं जल खँवःया अर्थ तब्ब्या यानाः
संस्कृतं नेपाल भाषाया थ्व खँवः थःगु याना काःगु खः ।
तर थौं वयाः पूर्वाग्रह दुपि संस्कृतवाजतय्सं जल खँवलं
लः खँवः दः वःगु जुइ धया चवन । इमिसं लखया ख व
नाख गनं वल धाये मफु छायाःसां थ्व खँवः नेपाल भाषा-
यागु हे खः ।

३. तेज- नेपाल भाषाय् जलया निगू अर्थ दु- लः व
खः । तसकं थोगु जःयात तिजल = तिजः धाइ । गथे
तसकं थोगु सःवात तिसल = तिसः धाइ व तसकं बः

बीगुयात तिजः बीगु धाइ । उकिं थ्वहे नेपाल भाषाया
तिजः खँवः संस्कृतय् बनाः तेज जूवंगु खः । मखुसा
नेपाल भाषाय हे न्हापां तिजःया तेज जुइ धुकूगु लयेफु ।
छायाःसां ह्याचाया ह्याचा खः थें तिजःया तेज नं खः ।
नापं जलय् खंकेगु अर्थय् ज्यलाचवंगु तय्जु वा तेजु खँवःया
स्वापू नं तेज नाप हे जक स्वानाचवंगु खने दु । यथे खःसा
थ्व तेज खँवः तप्यंक हे संस्कृतय् नेपाल भाषां वंगु खत ।

४. ज्योति- नेपाल भाषाया जति खँवः संस्कृतया
ज्योति खँवःया हामा खः । साखःया ति साखति थें जलं
पिहां वइगु जःया ति जति खः । जतिया ज्योति जुइत य
गनं वल धइगु न्हासः दने फु । थुकिया लिसः अःपुक
थुकथं बीफु । संस्कृतया पण्डितसें Man मायनयात
भ्यायन धाइथें जति वा जःतियात नं ज्यःति धाःगु खः ।
हानं य यःपि छखलः नं दु ७ । इमिसं जतियात ज्यःति
यानाः संस्कृतय् यंका ब्यूगु नं जुइफु । जतिया ज्यःति जुइ
धुनेब ज्योति जुइत थकु मजू । गथे, यःह्याया योह्य व
यःमरिया योमरि अःपुक हे छुयाचवंगु दु ।

५. सूर्य- थ्व नं नेपाल भाषां संस्कृतय् वनाचवंगु
खँवः खः । सूर्यया अर्थ नेपाल भाषाय् यथे खः- सु = सर्गः,
आकाश (गथे, सुपांय- सर्गतय् खने दइगु पांय सुतिलः-
सर्गतं ति जुयाः वइगु लः) व जः = जति, ज्योति ।
सर्गतय् दइगु जः जूगुलि सृजः जूगु खः गथे सुपांय जुल ।
सृजःयां सूर्य गुकथं जुल धकाः न्यंसा थुकथं जुल धाये ।
भाषा विज्ञानया नियम कथं 'ज' या 'य' जुइफु । गथे
स्वज- स्वय् । थ्व नियम कथं सृजःया सुय जुल । आः सु
व यया दथुइ र गनं वल लय् ? संस्कृतय् निगः खँवः

१. खवपया छगू पुलां सफुती लःयात लांख, लंख नं छयला तःगु दु ।

७. स्वया दिसं, "क्याल कसको" — बहान्ना सापकोटा, कवरैडा २१ स्याः ५ ।

सन्धि पायेबल्य दथुइ र तयेमाः गु नियम दु ८ । गथे, पुनः + बार = पुनर्बार, पुनः + जन्म = पुनर्जन्म । श्वहे नियम कथं सु + जः = सूर्ज = सूर्य जूगु खः । रेफ वयेवं हे न्ह्याः नेया भाखः दीर्घ याना व्द्येगु नं संस्कृतया बत्लाः गु नियम खः ९ । शुक्थं थन नं नेपाल भाषाया सुजः खँव संस्कृतय वनाः सूर्य जूवंगु खँ ववः ज्यूगु दु । नेपाल भाषाय ला सुजछः त्यहे दनि ।

६. देव- संस्कृतया श्व खँवः नं नेपाल भाषाया निगः खँवः 'दे' व 'व' त्वाकज्यानाः दयाचवंगु खः । दे + व = देव । नेपाल भाषाय देया अर्थ छाने, चव्य, तःधंहा खः । गथे देतने- छः नेतने, देलासा- लासाया नं चव्य लायेगु लासा, देभाजु- भाजु स्वयाः तःधंहा, देगः- तजाः गु गः । उकि नेपाल भाषाय 'दे व' या अर्थ व (मनू) तःधंहा (महापुरुष) जू वल । शुक्रियात अंग्रेजी भाय 'हिलेबल्य He is supreme जुइ । शुक्रथं तःधंहा मनू (महापुरुष) वा मनू स्वयाः तःधंहा (सर्वशक्तिवान) यात नेपाल भाषां देव धाः गु खः । गौतम बुद्धयात देव धाः गु नं श्वहे कारण खः । उकि श्व देव खँवः नं तप्यंक हे नेपाल भाषां संस्कृतय वंगु खत ।

७. जीर्ण- नेपाल भाषाया 'जिलन' खँवः संस्कृतय वनाः जीर्ण जूगु नं मखु धाये मछि । नेपाल भाषाय 'जि' या अर्थ अस्तित्व खः । गथे जिके जि मन्त (जिके लिंगु अस्तित्व मन्त) । 'लन' या अर्थ मन्त, फुत, तन वा नासजुल खः । गथे, धाः लन (धाः मन्त, धाःया अस्तित्व मन्त) उकि 'जिलन' या अर्थ अस्तित्व मन्त वा अस्तित्व हे मदयेक नासजुल खः । 'जिलन' या जिरन- जीर्ण अपुक हे जुइफु । गथे, कालबिलया कारवार, लवचया रोग जूगु

दु ।

८. स्नान- संस्कृतय स्नान ख्वाः सिलेगु वा स्वः ल्हुये- गुया अर्थय खः । उकि श्व खँवः या लः नाप क्वातुगु स्वापु दु । आः थन स्नान खँवल्य 'ना' या अर्थ नेपाल भाषां लः खः । लिपायागु 'न' की लः ली धायेथे नानी जुयाः वः गु जुइमाः । 'स' या अर्थ सहितं, नापं, सतिक खः । लः सहितं, लः नापं वा लः सतिक च्वनाः लः नाप श्वलय पुनेगु स्नान यायेगु खः । सुयय ख्वाः सिलेगु व स्वः ल्हुयेगु यात 'सनां यायेगु' 'सनां धुन ला ?' कीगु नेपाल भाषाय, आः तर्क ज्यला वया च्वंगु हे दनि । उकि श्व स्नान-सनां वा स्नान नं नेपाल भाषाया हे खँवः खः वल ।

९. समस्त- श्व खँवः खनेवं हे संस्कृतयागु मखु नेपाल भाषायागु खँवः खः धइगु ववः छी फु । छाय् धाः सां मचात वा मचाछाचातया अर्थय मस्त खँवः नेपाल भाषायागु हे जक जुइ फइ मेगु भाषायागु जुइ फइमखु । 'स' या अर्थ सहितं, नापं फुक खः । उकि समस्तया अर्थ नेपाल भाषां मचाछाचात नापं, फुक, सकलें, व्याकं, दक्वं धइगु जू वइ । " छि जक मखु मस्त नापं फुकक हासँ" धायेगु पहः आः तर्क कीथाय दनि । मस्त त्वः फित धाः सा फुकं, सकलें, व्याकं, दक्वं जुइ फइमखु । उकि समस्तया अर्थ मस्त नापं फुक खः । संस्कृतय नं समस्तया अर्थ थुलि हे जक खः । उकि श्व समस्त खँवः नं संस्कृतय नेपाल भाषां वनाचवंगु त्याज्यू वल ।

१०. मौलिक- नेपाल भाषाया मौलिक खँवः लाका यंकाः संस्कृतं मौलिक खँवः दयेकूगु खः । मांया लिक लाः गु धइगु अर्थय हे संस्कृतया मौलिक खँवः या नं अर्थ खयाचवंगु दु ।

८. स्वया विसं, पाणिनीया संस्कृत व्याकरण ।

९. संस्कृतया न्ह्यागु व्याकरण स्वया बीतां श्यु ।

बुलि दसि बी धुंकाः संस्कृत भाय् नेपाल भाषाया सन्तान मखु धकाः सुनानं कपाः स्याका मचवंसां जिल । थथे खयेक नं नेपाल भाषाया न्यागु खँवः नं संस्कृतं वःगु खः वा वःगु जुइ धकाः हाला जुइपि मनूतय्त संस्कृतं पूत्रग्रिह दुपि धाइ, अंग्रेजी बायस दुपि धाइ ब नेपाल भाषां मिखा तिस्यूपि धाइ । उकि उज्वःपिसं न्हूगु खँ छुं लुइके हे फइमखु, मौलिक विचाः गुबलें प्वंके हे फइमखु । प्राकारयां पःखाः जूगु हं, पण्यशालयां पसः जूगु हं, ब्याख्यानयां बाखं जूगु हं, नाटेश्वरयां नासः जूगु हं । नेपाल भाषा ला भाषा हे मखुथे खँ ल्हाइगु । प्राकारया पःखाः जूगु खयेकेत आकारया अःखः जूगु खयेके मानि, पण्यशालया पसः जूगु खयेकेत जीर्णशालाया ज्यासः जूगु खयेके मानि, ब्याख्यानया बाखं जूगु खयेकेत ग्याख्यानया ग्याखं जूगु खयेके मानि, नाटेश्वरया नासः जूगु खयेकेत वानेश्वरया वासः जूगु खयेके मानि । अनुमान जक यायेगु खःसा छु जक अनुमान याये, छुकिंयां छु जुइके ! पसःयां परमेश्वर दयेके लाकि पःखाःयां पशुनिस्तान दयेके !

प्राकारया पःखाः जूगु मखु । 'पने', 'पःखुये', 'पंगलः' या हे तःकेहे खः पःखाः । नेपाल भाषाया पुलां सफुती प्राकार, प्राखार, पराखार च्वया तःगु दुसां व उबलय्या संस्कृतवाजतसे संस्कृत त्वाकछ्यानाः च्वयातःगु भाय् खः गथे थौकन्ह्य नं संस्कृतवाजतसे संस्कृत त्वाकछ्यानाः व अंग्रेजीवाजतसे अंग्रेजी त्वाकछ्यानाः नेपाल भाषा च्वयाच्वन । नेपाल भाषाया थःगुहे खँवः 'इहि' दयेक नं संस्कृतवाजतसे विवाह, विहाः, ब्याहाः ब्याः च्वयावंगु नकतिनियागु खँ खः । इहि खँवः विहाः खँवःनाप उज्वःलाःथे च्वनेव इहि खँवः विहाः खँवलं दःवःगु धाये फइमखु । थुकथहे पःखाः नं प्राकार वा पराखार वःगु मखु धइगु खँ धिसिलाः ।

ब्याख्यानया बाखं जूगु खँ नं सुनानं ह्यगस्य भ्कंगु

खँ जक खः । बाखं संस्कृतया ब्याख्यान खँवलं वःगु खः धाइपिसं बात्वाः, बापु, बाक्, बाबू-बामबू खँवः संस्कृतया गुगु गुगु खँवलं वल धइगु कथने फयेके माः । तर इमिसं कथने मफु । उकि बात्वाः, बाक् थें बाखं नं नेपाल भाषाया थःगुहे खँवः खः । नेपाल भाषाय् ब्याख्यानया पर्यायवाची खँवः ल्हायेगु, कनेगु, धवाथुयेकेगु दु । संस्कृत्य बाखंया पर्यायवाची खँवः कथा दु । संस्कृतया कथा खँवः तत्सम रूप नेपाल भाषाय् "कथा ल्हायेगु" जुयाः वयाचवंगु दयेक ब्याख्यानया बाखं जुयाः वयेमाःगु मखु । ब्याख्यानया बाखं खःसा "कथा ल्हायेगु" या थासय् व "बाखं ब्याख्यान यायेगु" या थासय् "बाखं ल्हायेगु" व "बाखं बाखं यायेगु" जू वने माल । बाखं बाखं यायेगुया अर्थ छु जुल ? थ्व न्हिले पो मफइगु खँ खः । उकि ब्याख्यानया बाखं जूगु मखु बर कथाया पर्यायवाची खँवः बाखं नेपाल भाषाया थःगुहे खँवः खः धाये फत । नेपाल भाषाय् बाखंया अर्थ थुकथं छयायेफु- बा = बछि (फुकं मखु), खं = खँ खः । थुकथं बाखंया अर्थ बछि खँ अर्थात् फुकं सत्य मखुगु खँ धइगु जू वइ । बाखनय् मखुगु खँ खयेकाः व मज्जुगु खँ जुइकाः कथनेगु खः, कनेगु खः । बाखंया घटना, पात्र वा विषयवस्तु यथार्थ थें च्वनाः नं वास्तविक मखु । थाय्या नां, पात्रया नां धात्थेयागु खयाः नं घटना काल्पनिक जुया च्वनी । उकि बाखनय् बछि खँ खःगु जूसा बछि खँ मखुगु जुया च्वनी अर्थात् फुकं खँ सत्य मखुया च्वनी । थथे जूगुलि न्यानागु भरय्, इतिहासया भरय् वा कल्पनाया भरय् कनीगु कथा वा Story यात नेपाल भाषां बाखं धाःगु खः ।

थुकथं नेपाल भाषाया गुलि नं खँवः संस्कृतं वःगु खः धयाच्वन व फुकं संस्कृतं वःगु मखु, मखुयेके फु । बर च्वय् न्यायनागु थोथी कारण संस्कृत हे नेपाल भाषाया सन्तान खः । थुकियात धवाथुइकेत मेगु छगु खँ नं न्यायने-

बहः जू । छु धाःसां नेपाल व पालया क्वातुगु स्वापू दु । नेपालया नेवाःत व पाया शाक्यत गुलि सती धङ्ग खं पाल देश बःपि शाक्यत आः तकं नेवाः जुयाच्चंगुलि क्यनाच्चंगु दु । थुकथंहे^१ नेपालया नेपाल भाषा व पाल देशया पाली भाषाया नं क्वातुगु स्वापू दु १० । थव पाली भाषा नेपाल भाषाया सद्दे केहे खः । नेपाल देश निकू दलाः दक्षिणपाखे पाल देश दयेव तिनि पाली भाय् दयेकूगु खः । उकिं पाली भाय् नेपाल भाषाया मेगु रूप जक खः । नेपाल भाषा एकाक्षरी भाय् खः ११ । थव भाय्या छगः छगः आखलं तःगू अर्थ पिकाये ज्यू । गथे वा, खः, जः, धः, फः । उकिं नेपाल भाषाया निगः वा निगलं अप्वः खंग्वः ह्वनाः मेगुहे अर्थ पिहांवइगु न्हूगु खंग्वः दयेके ज्यू, न्हूगु भाय् दयेके ज्यू । गथे, म+दु+ भूमि=मदुभूमि-मरुभूमि (बुज्यायेत भूमि मदुगु थाय् मरुभूमि खः), वा+लः+ खः=वालःखः-वारखा-वरखा-वर्खा-वर्षा (सर्गतं वइगु वा लः खः धायेत वर्षा खंग्वः दयेकूगु खः ।) । गथे जुयाः नेपाल भाषाया छगू न्हूगु कचा जुयाः पाली भाय् ब्वलन । पाली भाय् नं उबलय् जनभाषा जुयाः तःमि जुजुं वन । पाली भाय् जन भाषा जूगुलि हे गौतम बुध्दं थःगु शान्ति सन्देश थव भासं न्ह्यगु खः । नेपाल भाषाया छगू कचा कथं ब्वलंगु थवहे पाली भाषाया संसर्ग्य च्वंपिसं थः भच्चा सुसंस्कृत जुइव पाली भाषाया फुक खंग्वः त्याये कयाः दयेकूगु न्हूगु भाय्या तां संस्कृत खः । थुकिं छु खं ध्वाथू वल धाःसां संस्कृतय् नेपाल भाषाया खंग्वः दुहां वने न्ह्याः

पाली भाषाय् नि दुहां वंगु खः । न्ह्याकथं दुहां वंगुज्जां संस्कृत नेपाल भाषायाहे सन्तान खः वल ।

छुं दं न्ह्याः भारतया छह पण्डित पी. ए. भोकजुं छगू पत्रिकाय् छपु लेख च्वयाः अंग्रेजी भाय् संस्कृत भाय्या सन्तान खयेकेगु कृत याना दिल १२ । वय्पालं संस्कृतया त्रि-गुणा-मात्रा, विदुर, मातृ, पितृ आदि खंग्वः अंग्रेजी वनाः Trigonometry, Widows, mother, Father जूगु खं न्ह्यथनाः अंग्रेजी भाय्या हामा संस्कृत खः धायेत उसिहि सनाः खं ह्वाना दिल । थवहे खं तयाः वय्कलं अंग्रेजीया ततःधंगु शब्दकोष दयेकूपिन्त नं पौ च्वया दीगु जुयाच्चन । तर अंग्रेजतसें वय्कःयागु खं मन्यं । छाय्धाःसां अंग्रेजतसें नं संस्कृत व अंग्रेजी निगुलि भाय्या हामा नेपाल भाषा हे खः धकारः स्यू । आः अंग्रेजीया हामा नेपाल भाषा गुकचं खः वल धइगु ध्वाथुइकेत अंग्रेजी भासाय् वनाच्चंगु नेपाल भाषाया छुं खंग्वः न्ह्यथने ।

१. फ्याल-फयलिन-फयन-फायन- Fan । फयनाप स्वापू दुगु फ्यालि हे Fan खः । फ्यालिचा स्वबाः हे Fan (पंखा) दयेकूगु खः । अंग्रेजी ल या उच्चारण जुइ मख १३ । गथे Calm-काम, Calf-काफ ।

२. बाजन-बाज- बाजो- बाजो- Banjo । नेपाल भाषाय् थायेगु फुक बाजायात बाजं धाइ । अंग्रेजी थुकिया अर्थ संकोच जुयाः छता बाजंयात जक बान्जो धाल ।

३. सिथ- Sitha-सिड-Side (River Side-

१०. पाली भाय् व नेपाली भाय्या छुं स्वापू मदु छाय्धाःसां खस कुरा वा गोरखा भाषाया लिपा तिनि नेपाली नां छगु खः ।

११. स्वया दिसं योगेन्सनया नेपाल भाषा व्याकरण व शब्दकोषया भूमिका ।

१२. स्वया दिसं The Illustrated weekly of india । दं, त्याः त्वःमन पुलांगु फाइलय् माला दिसं ।

१३. स्वया दिसं The oxford english dictionary

खुसि सिथे) । अंग्रेजी उच्चारणया नियम ब्रवातु मजू,
Thus डम् जूसा Thumb थम् जुड । श्वहे नियमं
सिथया साइड् जू वंगु खः ।

४० बि-बिड-बी-Bee नेपाल भाषाय् बिया अर्थ की
खः । गथे, न्हय्बि, बिलि, माय्बिलि, बिखू (सर्पया लं) ।
थुक्रिया नं अर्थ संकोच जुयाः अंग्रेजी हायात जक बी
घाइगु जू वन ।

५. न्हास-नास-न्वस-न्वज-Nose । अंग्रेजी s या
उच्चारण स व ज नितां जू । गथे, Dose- डोज्, Dust
डस्ट । थुकथं हे न्हासया न्वज जूगु खः । Nasal या नं
न्हाय् लिसेहे जक स्वापू दु ।

६. चवख-चवः-को-क्रो-Crow । अंग्रेजी फस्ट धायेत
First फस्ट चवइगु, कू धायेत Coup कूप् चवइगु ।
थुकथं हे थन नं को धायेत क्रो Crow चवःगु खः । तर
लिपा जुजुं क्रो हे धया छ्वःगु जुइमाः ।

७. इल-इला-इरा-Era । अंग्रेजी इरा वा एराया
अर्थ थुकथं खः Era - a point of time;
Epoch १४ । नेपाल भाषाय् नं 'इलय् नयेमाः' व 'छगू
इलय्' धायेबलय् छगुलि निश्चित ई व मेगुलि छगू युग
धइगु वयं । उकि इलया हे इरा जूगु खः ।

८. घयः-घयःघी-घी-Ghee । थन घयःघीया घी जक
तप्यंक अंग्रेजी वंगु खनेदु ।

९. प्वः-प्वर-पोर-Poor । नेपाल भाषाय् प्वः
धयापि बिप नापं प्वना नइपि तसकं गरिवपि खः । प्वःया
पुलांगु रूप प्वर खः । प्वरपाय् आः तक प्वःत इनि ।
अंग्रेजी Poor या उच्चारण व अर्थ नेपाल भाषाया प्वः

थं हे खः । उकि श्व खँवः नेपाल भाषां तप्यंक हे अंग्रेजी
वंगु त्याज्यू ।

१०. कले-कलेक्ट-कलेक्शन-Collect । नेपाल
भाषाया कलेचिने (छुपु छुपु वा छत्वाः छत्वाः मुनाः
कलेचिनेगु) व अंग्रेजीया कलेक्शन नुवायेबलय् अपाय्सकं
मपाः, अर्थ नं वहेतुं खः-छथाय् मुनेगु । थयेहे यले
खँवः नं यलेक्ट, एलेक्शन जुयाः Election जू वगु दु ।
नेपाल भाषाय् यलेया अर्थ नं Election या थँ हे
बांमलाःगु त्वःताः बांलाःगु ल्ययेगु खः । अंग्रेजी भासाय्
खँवःया ल्यूने लितांसा तयेगु चलन ग्रीक भाय्या प्रभावं
लिपा तिनि वःगु खः १५ । नेपाल भाषाया कले व यलेया
कलेक्शन व एलेक्शन थुकथं हे लितांसा तनाः जूगु खः ।
गथे Exam-Examination ।

११. चर्चा-चर्च-Church । धार्मिक म्ये हालेगु
थाय् अर्थात् चर्चा हालेगु थाय्यात हे अंग्रेजतसें चर्च
धया छ्वःगु खये माः । गथे सिनेमा वयनेगु थाय्यात हे
सिनेमा धया छ्वःगु दु १६ ।

१२. (वन) वन्तां-वन्त-वेन्त-Went । भूमि भासं
आः तक वनेगु अर्थय् वान्तां धयाचवंगु दु । श्वहे वन्तां
अंग्रेजी Went जूगु खः । मखुसा Do-did-done
जूथें Go-gid-gone जुइमाःगु खः ।

थुकथं हे मिसाया Miss, ल्यासेया Lass, पातया
Plate, वाया Water, क्वलया Coal, प्वालया Pole,
साखलया Sugar, चिपया Cheap, सुयेया Sew,
अब्बाया Abba दुवाःया door, मि (मनू) या me,
अप्वःया apposition, प्वः (चक्का प्वकाया प्वः) या

१४. स्वया दिसैं Ward- Loce & co's Standard Dictionary, London

१५. स्वयादिसैं, 'Our Language', Sineon Potter, -Pelican Books, England,

१६. स्वया दिसैं, Bhargava's Dictionary, Anglo-Hindi

Pole, ज्वनया Join, सुलप्याच्चया Slope, सीखया sick, माकःया Monkey, दन्किनीया donkey, पातया pot, कःनिया corn, पसःया shop, सीगाःया see, नाइसे (नाइसेचवं बांलाः) या Nice, ह्लिनया Noon, ने (ने खः=मखु) Nay, नांया Noun, कुन (कुं) या cone, हात (हातहित) या Hit, पाँच (पाँय्) या patch, वाई (वाईया मिनाः पातुगु) या wine, वाःचाःया watch, पीके (मनूत ज्याय् वयेवने मफयेक लँ पनेत पीका तयेगु) या picket, की (निगः निनाः स्वायेत की तातेगु, निगः लिकायेत की नं लिकाये माः) या key, गंया gong, नः (बिबि नः, नुगः नः) या gnaw, हचुं (रंग) या Hue जूगु खं नं त्वःमंके फइमखु ।

थुकथं संस्कृत थें अंग्रेजी भाय् नं नेपाल भाषायाहे सन्तान खः धइगु खँ वःज्यूगु दु । अय् नं छगू न्ह्यः न्ह्यःने चवं वयेकु । छु धाःसां, नेपाल भाषाया प्रभाव तापाक चवंगु अंग्रेजी भासाय् गुकथं लाः वन । थुकिया लिसः मालेत भाषाया इतिहास जक सीकां मनाः पृथ्वीया हे इतिहास सीके माः । गथे धाःसां ह्यापा ह्यापा थौंकल्लया फुक महादेश छगुहे खः, छधी हे खः । Continental Drift Theory कथं उबलय् भराय्धगु महादेश कुचा कुचा दलाः, छथासं मेथाय् न्ह्याना वनाः तिनि थोथी महादेश, टापू आदि थौंकल्लया थासय् लाः वःगु खः १७ । उबलय् उगु ग्यानापुगु परिवर्तनं सुयात छु मजुल जुइ ! छथाय् छिक च्वच्वपित नं मछिना वल जुइ, मेथाय् च्वं वने माल जुइ । उकि छललः नेवाःत नं नेपाल त्वःताः यूरोपपाखे च्वं वन जुइ । उबलय् यूरोपय् च्वंवां नेवाःत

गन चवन जुइ भइगु खँ सुनाबं वःछी मफुनि । तर व नेवाःत थौंकल्लय् इटालिया छगू शहर जुयाचवंगु नेपल्स (Naples) धइगु देश दयेकाः चवंगु जुइ धइगु खं यक्व सत्यता दयेकु । नेपल्स इटालि काये न्ह्यः छगू स्वतन्त्र राज्य खः । नेपाल थें नेपल्स नं पर्वतया बससं चवंगु देश खः । थनयापि मनूत नेवाःत थें हे ज्या सः । नेपालय् नेवाःतय्गु स्ये व नखःचछः तसकं नांजाः थें नेपल्सयागु स्ये व नखःचछः नं तसकं बांलाः, तसकं नांजाः १८ । उकि यूरोपया थ्व नेपल्स नेवाःतसँहे दयेकूगु देश खयेकु १९ । न्हूगु देश दयेकूबलय् उगु देशया नां थःगुहे मातृदेशया नां वकयाः तइगु तसकं स्वाभाविक जू । गथे अंग्रेजतसँ अमेरिकाय् वनाः New England व फ्रान्स्वतसँ New France दयेकूगु दु २० । मां अबुया नां वकयाः नां छुइगु कीथाय् आः तकं चलन दनि । गथे, राम बहादुरया काय् राम भक्त, रत्न शोभाया न्ह्याय् रत्न कमल । थुकथं नेपाल्स देश दयेकूपि नेवाःतय्गु नेपाल भाषाया प्रभावं नेपाल भाषाया खँवः अंग्रेजी भाषाय् वंगु खः धइगु खँ धवाय् वइ ।

थ्व भासा अनुसन्धानया लेख गुपुन्हिया लसताय् ख्यालं ख्याल जक च्वयागु खः । मेबलय् धातयें नी यानाः च्वत धाःसा अज यदव सत्य खँ लुइके फइ तिनि । उकि त्रिभुवन विश्वविद्यालय, प्रज्ञा प्रतिष्ठान थेंजाःगु सस्थां याकनहे न्ह्यःकथं पलाः छीगु भाशा याना । नापं नेपाल व विश्वया फुकक विद्वान धाःपिसं नं न्ह्यापु थासय् तयाः जक अनुसन्धानया ऊयातुगु कु ववबुइ धइगु नं आशा याना ।

१७. स्वया दिसं, Wegener's Hypothesis, An Introduction To Geomorphology, Morgan, London

१८. स्वया दिसं, The columbia Viking Desk Encyclopedia, पौ १२३८

१९. मखुसा नेवाःत नवें देशय् वा नेदरल्याण्डय् चवंगु नं खयेकु, नेवार लायण्डया नां लिपा नेदरल्याण्ड जू वनीगु यववं सम्भावना दु ।

२०. स्वया दिसं, The Columri Encyclopedia, columbia University. U.S.A.



या धापू

१. गुंपुन्हिया लसताय्

गुंपुन्हिया लसताय् थगुने थें थुगुसी नं थव ख्यालि
न्हिलिया ल्याः न्ह्यब्वयाचवना ।

थौकन्हय्या थव बांमलाःगु व ग्यानापुगु मौसमय्
“क्री” या थव ख्यालि व्वनाः व्वमिपिसं गुलि नुगः तये फइ
जिमिसं मस्यू । थौकन्हय्या थव बांमलाःगु मौसमं हःगु
खुसिबालं जनताया छेँ बुँ चुइके यंकाचवंगु दु । ज्यापु
ज्यामितय् हि चःतिया बलं थाहां वःगु वामा व्वथला व्यूगु
दु थव मौसमं । थव मौसमं जनताया हागस चुचुं याना
व्यूगु दु, इमिगु सुख लाका काःगु दु । थहां मनं तुनाथेंया
बांलाःगु मौसम मवःगुलि फुक्क ज्यापु ज्यामितय् ख्वाः
ख्यूंसे ख्यूंसे चवं । इपिं न्हिले मफु । इमि नुगः खः । थव
फुक्क खँ जिमिसं वाःचाः । अथेसां निराश जुयाः ल्हाःतुति
त्वःता छ्वयेगु ई मखु थव । थौया मौसम बांमलाःसां
कन्ह्य बांलाःगु मौसम वइतिनि । उकिं नुगः व्वमतुंकुले
खुसिबाः पनेगु ई खः थौया थव ई । थौया मौसमं दुःख
सोकातःपि जनतायात नं पलख न्हीकाः बांलाःगु भबिब्यया
आशां वयंके फइला धकाः थव ख्यालः ल्याः न्ह्यब्वयागु
खः । थव ल्याः स्याःनुगः घानाचवंपि जनतायात गुंपुन्हिया
लसताय् देछाया चवना ।


२. दुबिस्ता खँ

“क्री” लय्पौया दुबिस्ता खँ मेबलय् कने मछाःसां थौं
गुंपुन्हि जुयाः मछालेम्बाःगुलि कनाचवना । छु धाःसां पुन्हि
पतिकं बिहां वयेमाःगु “क्री” जिमिसं इलय् इलय् पिकाये
मफया चवन । च्वमि, ग्राहक, विज्ञापनदाता व मेपि यव्व
पासापिनि ग्वाहालि दयाः नं “क्री” लय्पौ इलय् पिकयाः
व्वमिपिनि न्ह्यःने तये मफयेगु जिमिगु हे जक कमजोरो
खः । उकिं व्वमालि जुयाः सकसिके क्षमा पवनाचवना ।

“क्री” लय्पौ इलय् इलय् पिकाये मफयाचवंगुया छगू
जक सू कारण लय्पौ इनीहा छहा गतिताःह्य मनु चूलाके
मफया चवंगुलि खः । पिदंगु पौ इने व्वमचावं न्ह्यगु पौ
पिथनेबलय् पुलांगु पौ अथें ल्यनाः भवं न्यायेत व प्रेसयात
बीत माःगु दां मुने मफइगु । इलय् पौ पिकया थें इलय्
इनाः इलय् हे दां दुथ्यंके फुगु जूसा लय्पौ इलय् पिहां
मवयेमाःगु मेगु छुं खँ मडु । आः ला लय्पौ इनीहा
बांलाःह्य मनु नं चूलाये धुकूगु दु । उकिं लिपां निते
“क्री” लय्पौ इलय् इलय् पिथनाः इलय् हे व्वमिपिन्थाय्
थ्यंके फइगु आशा याना ।

मेगु खँ बचंपौ जक बियाः ग्राहक जुयातःथाय् पौ
बियाः घ्यवा नं कयाहयेमाःगुलि इनीपि उसि चाइगु ।
गुबलें मनु नापमलाइगु गुबलें छु जुइगु । मेपि ग्राहकतय्
थाय् थें पौ जक सुक्क बिया थकां गाःगु जूसा इनीपिन्त
अःपुयाः इनेज्या नं याकनं सिधइगु । उकिं बचंपौ जक
बियातयादीपिसं नं न्ह्यथ दां बियाः दछि वा खुलाया ग्राहक
जुया दीसा ज्यू धकाः इनाप याना । थथे जुल धाःसा “क्री”
लय्पौ इलय् इलय् पिकायेत अःपुइ ।

“क्री” लय्पौ च्वन्ह्याकेत सकस्यांपाखे न्ह्याबलें
ग्वाहालि दया च्वनीगु आशा याना ।



HOECHST PHARMACEUTICALS LIMITED

यःगु हे देशय् थाःगु जरी दुगु दोपत्तापसिया निति

❖ होण्डा ❖

H O N D A

H O N D A

H O N D A

मोटर साइकल व स्पेर पार्टस्या निति लुमंका दिसँ ।
अथे हे होण्डा पावर टेलर व होण्डा जेनेरेटर नं जिमियाय् दु ।

स्यामुकापु ट्रेडिंग कंपनी

ज्योतिभवन, कान्तिपथ, कान्तिपुर

फोन नं ११४९०

थाकू :- चांमुन्द्रा प्रेस, यतखा, ये । फोन १३६५२